

Irooho Soowootoha



Mooxeleliwa, apatthani. Kootteeliwa murima okhala va voosiis'ula, ni osuwela wira kinniwoonani othene anyu, naaminiki wira Apwiya ari ni hiyo olelo, anivahaka muuttutthi vakhani, wira ohikhale moovihaxa mutapernakulu mu wa muteko wa voosiisu. Nto vano hiyo . . .

² Kookupali, aakhala anamwane. . . Anamwane aaroihiwa musaala mw'aya, Munna Neville? Koowoona axinamwane kamosa-kamosa, ni kaatthuna osuwela paahi sinto yaahiroihiwa makhuru orowa mwawaya—mapuro aya makina, musaala mwaya mw'exikola ya Ttiminku.

³ Vano, mukivekelele. Kookhalana exawuri kaatthun'aka wira nsana ohiyu, nto kihaana wira olelo. Vano ekereja evekele. Kookhalana mu—kookhalana muthukumano ontharelana onoorwa, onrowa okhala oliinyani wa Ekurtiina ya Yuuma wAlemaanya, ni ti woottittimiheya. Nto mukivekelele. Vano tivo, ti, ninoowerya opacerya naanaanoru mustaatiyu mme yuulupale ya kriketi wAlemaanya, Hitler aapakaly'awe okathi vakhani ekhotto ehinatthi opacerya, nipuro nimosa nooreera nuulupale, ankela-mo athu ikonto miloko mithanu na miraru. Nto ninoowerya okhalana ohiyu muloko, woottharana. Nto tivo ninwehererya opacerya wuuwu naanaanoru, nto nuumala oLa Salle Lorraine, oFransa, voottharana, nto oBerlin, ninootthika. . . Kintthuna wira, oBerlin eriyari ya yeele ni—ni Fransa.

⁴ Vano ninootthika, Apwiya yatthuna vale, vamuthukumanoni oChicago. Ompacerya, kinoona wira, mahiku yeettaka mathanu, mathanu na mosa, mathanu na manli, mathanu na mararau, ni mathanu na maxexe, akhanle mpantte aka oChicago, wa muthukumano o—okereja y'oSuweesiya. Nto awo ti, Mwenye Boze, amosa-amosa wa nyuwo a mukerekhere w'oChicago, aakhhalana muthukumano onrowa wiiraneya ela enttharelana. . . opacerya nihiku noopacerya n'Agosto, wala nihiku noopacerya na Setembro, ti, oSuweesiya. Ni nkireere otteeliwa murima osuwela wira koothanliwa, wira kirowe-wo, yaari y'atthu othene ni ipursentu emiya. Kaahitteeliwa murima ni yeeyo, masi kihaana orowa wu ahiiso orwa nno vano. Nvekele wira Apwiya ekihoolele vekeekhai nipuro minepa sinci-ene sinrow'aya woopowa, ni vanrowa wiiriwa yooreera wa Omwene wa Muluku. Vano, wookhalaniwa muthukumano wu, ni—ni awo oSuweesiya, n'uwo ohimnye wira naamurowa okhalana athu ikonto miloko miili ni thanu, miloko miraru ni thanu opacerya wene, vamuthukumanoni, nto anci-ene aya athu oo hoopowa.

⁵ Vano nto wAlemaanya nno, ahe, awo aakhalana estaatiyu ankela atthu ikonto miloko mithanu na miraru. Vekeekhai, hiyo, oSuwiisa weiwo nikhumaly'ahu naanaano, naahikhalana muthukumano wooreera wu, ni anci-ene a nyuwo alakela nlelo khamwiiwale. Apwiya yaahinireeriha voowerya-vo, naahikhalana ikonto miloko mithanu oorukunxa murima ohiyu mithanu, o—o—oZuriki, Suwiisa.

⁶ Vano nto, Munna Jack Shuler, anci-ene a nyuwo munnimusuwela, owo Mmetotista, mwaana a mutokweene Bob Shuler. Awo arisa oBelfast vano, ni—ni anihimya wira anoorukunxela vathi nipuro nlo, weiwo, wa Ehapari yooreera, ni hata muulupale ovikana ole Billy Graham aarin'awe vamuthukumanoni vawe. Jack mmiravo mmosa ooreera murima saana, oowivaha saana ni oowaatta mphento. Ni owo—ni owo t'exariya saana wa yeeyo mpakha sinaamin'aka wira owo murumeyi muulupale a Apwiya. Vano munvekelele Munna Shuler. Ni—ni ti Jack Shuler, ni Jack MacArthur ori ni yoowo nave. Munna Jack MacArthur mulaleyi muulupale, nave. Ni wu ale ari atthu a mukereja ahimnye wira owo muhakalaliho mmosa muulupalexa otonko okhala wIrlanta. Tivo hiyo nri o. . . Ninnivekela khula nihiku mwaha w'awo—w'atthu awo. Awo oowanli amiravo, oohiphya, arina miloko mixexe, woona waka, wala oohiphya, amusi ni sikina, ni awiixuttihi oophwanela ni oolipa a Ehapari yooreera, ni hiyo ninnaaphenta.

⁷ Nto vano, miyo—miyo kinvekela wira muhikiliyale, wira—wira Muluku akithuniherye wira ethanlelo yooreera naanaano va. Imaara sikina mutthu khonsuwela mpanthe woorukunuwela. Mootoko ophiyerya vaavo? Kookupali wira Paulo aahiphierya nipuro nenlo emaara emosa, khaphiyenrye? Waari eriyari ya irikelo piili. Nto okathi waarow'awe, vano, owo aahoon nlaikha mwa yoowoona naamuhimenrye wira, "Murowe mpakha oMasetoniya." Tivo Apwiya aakhalana Nlaikha Naya nlelo, kharina? Kawerya-ru paahi okhala oowiiyeviha mmurimani mwaka mwaha wa yeeyo ntoko Paulo saary'awe.

⁸ Nto vano, ohiy'ula, muupuwele miteko s'okokhorela sa Ehapari yooreera otapernakulu wenna, atthu othene murwe. Nyuwo munikhuma oLouisville, kinrowa olavula oKereja ya Mukhora Wootthukuwa, ohiy'ula, iwoora piili, ewoora ya neethanu na piili ni minuutu miloko miraru mpakha thanu na xexe ni minuutu miloko miraru, okereja wa Munna Cauble. Miyo kaarowa orwa vaara vaili va. Vano nto owo mulopwana mmosa ooreera murima saana, nto owo khukilikarela. Vano Munna Cauble, owo mulopwana mmosa oolakeya saana, munna. Nyuwo, kookupali wira munnimusuwela, munna mmosa ooreera murima saana, ni yaamukhala yoorika omuthanya siiso. Nvekele. Vasulu va itthu sothene, nvekele, ni nvekele wira Muluku anivahe e—ethanlelo yooreera wira.

⁹ Vano, nihinatthi opacerya Mutthaka wa Ehapari yooreera, nrina voosisu ninthun'ahu waavahererya axinamwane. Ni miyo kookhalana mwaamukhaani mmosa va wira kinvahererye, nave, w'Apwya. Vano, imaara sinci-ene mukereja sinci-ene . . .

Munniwerya wiiwa saana, ottuli iwo? Mwaaweryaka vale, ti yoolikana? Mavekhuvekuh ala nno, miyo paahi, khivanweryaneya wiisiwa mmansinyu. Nnari, eyo, yoolikana. Kinoova opweteya kihirina yeeyo.

¹⁰ Tivo a—axinamwane, imaara sikina awo animwaamiserya, mukereja, aryeene axinamwane akhaani. Nto, vekeekhai, eyo enkhuma okereja Katolika, yo waapatisa yaavahiwaka nsina axinamwane akhaani, wala “waapatisa” ntoko awo siniihan'aya nlelo aryeene axikhaani. Ekereja Metotista yooruha yeeyo, y'opatiiso w'anamwane, ni anci-ene, ni kinoona wira sikina sinci-ene. Kinoona wira eyo ti yaari evirikanelo ya Nasareno ni Metotista ya khalayi, waari opatiiso w'anamwane, vano nto ivalaanelo sikhaani ni sikina. Masi, enakhaleru enamuna xeeni, eyo kheni, kinoona wira kahi etthu yuulupalex. Okhala wira, tthiri, kinoona wira Kalvario oorantela etthu ene, weiwe, yothene eyo, ti yeeyo, 'okhala wira Yesu okhwiye iwe wira awoopole axinamwane ni woopola olumwenku.

¹¹ Vano mwanamwane mwaamukhaani, hata akhalanaka axitiithi a enamuna xeeni, hata ekhalaka anatampi, eyo kherina hata evirikanelo, maana Ephome ya Yesu Kristu ennimurapiha, moone, ni ola ti Mwaapwittipwitthi a Muluku onttopiha sootheka s'atthu. Mwanamwan'owo khokhanle orukunxaka murima. Owo khonsuwela moota w'orukunxa murima. Owo khorina niwoko n'okhala va, mmansawe. Khokhanle wooleelani xeeni okhalenly'awe va. Masi Muluku oomuveleeliherya va, nto Ephome ya Yesu Kristu ennimurapiha okathi ene yoowo owo onrw'awe molumwenkuni. Ni ti mpakha ophiya munnuwelo w'osuwela etthu, vano onosuwela yooreera ni yootakhala, vano nto eniriha wira owo ohaana ottharuwa ele ensuwel'awe wira ohiira yootakhala. Ti yeeyo. Tivo, akina w'awo animwaamiserya, ni anuupuwela wira awo khanrowasa Wirimu.

¹² Ni wookhala mwiixuttiho onihimya wira mwaana ayariwa n'axitiithi arina Eroho Yowarya, ahe, mwaan'owo onoorowa Wirimu; masi, aahikhale, khiivo enimuhaleela, mwaan'owo khakhanle tu. Eyo ti yoovonyeya voomalela. Evirikanne xeeni sinto owo orina axitiithi arina Eroho Yowarya? Sothene othuna w'ekhapa, ni mwaana oniyariwa enamuna emosaru. Vano, othene “aniyariwa mutampini, ampakiwa mwa sootakhala, anrwa molumwenkuni yoothaka.” Eyo, eyo t'ehimeryo ya Yoolempwa ya yeeyo.

¹³ Tivo, vano nto Ephome ya Yesu Kristu ennimurapiha ennipaka elivelo wa mwaan'owo. Owo aakhwiye, aamurowa voolikaneene Ohoolo wa Muluku, hata ayariwaka n'axitiithi

ootepexa okhala anatampi a mulaponi, mpakha aphiyerere munnuwelo w'osuwela etthu vaavo vansuwel'awe yooereera ni yootakhala. Vano nto eniir'awe, okhuma vaavo, owo ohaana oleveliwa mwaha wa yeeyo. Ohaana ovekela orukunxa wawe murima okhuma vaavo mpakha ohoolo. Masi aryeene mwaana. . .

¹⁴ Vano, enamuna sintthun'ahu otthara, va otapernakulu. Ti nipuro nimosa paahi molumwenkuni onrow'aka, onlaley'aka Mwixuttiho, ti vaava otapernakulu, okhala wira ela ekerej'ahu. Ni hiyo ninlaleya Mwixuttiho va wira naakhalihe atthu oolakihereya. Atthu akina, mukereja mwaya, anlaleerya khula etthu awo anaamini aya. Ni awo axinn'aka, ni hiyo pooti nivaanyihanaka vakhani, masi nlelo n'axinnaa vomasaru. Ni, masi va mutapernakulu, hiyo ninlaleerya ele enuupuwel'ahu wira Mwixuttiho wa Soolempwa. Ni, memmo, hiyo ninnoona wa ovahereriwa w'anamwane, ele eniihan'ahu ovahereriwa, wira emaara emosa paahi mBibiliani okhanly'ahu ophwanyaka, wala mwa Waataana Wa Naanaano vaavo axinamwane axikhaani yaatonko okhalana nnaata etthu, wala Kristu otonko awe okhalana naata n'iyu vaniirani, waari, okathi Owo aakunx'awe mmoononi mw'Awe khuwiixaatherya matata Awe khwaareeriha, khwira, "Mwaahiye anamwane erweeke wa Miyo. Muhaakoottiheke, maana Omwene wa Muluku ti wawaya."

¹⁵ Vano, hiyo noohiyeriwa, ntoko sinsuwel'ahu, wira nikeleleke ohoolo muteko owo aarwiyy'awe o—ovara. Okhwa Wawe oKalvario, Owo aari ni hiyo ni Owo oronwe okhuma. . . aakhumme wa Muluku, arwaaka molumwenkuni, khutthika wa Muluku, ahiiso okhuma molumenkuni arowaka wa Muluku, khurwa-tho mwa mukhalelo wa Eroho Yowarya, nto ori ni hiyo, mwa hiyo, mpakha omala olumwenku, avaraka Mukereja mw'Awe muteko mmosaru Owo aavanry'awe okathi waary'awe mulaponi mu. Nto, tivo, hiyo ninaaroiha an'ihu mmosa ni mukhw'awe, w'arumeyi, nto awo animwaavekelela, owiixaatherya matat'aya ni waavahererya wa Muluku. Niira naamukhaani paahi nnihimya wira ninnixukhuru ele Apwiya aniireny'aya hiyo n'axinamwane.

¹⁶ Vano, vakhala wira mwan'inyu oroomiseriwa, wala khula enamuna ery'aya okereja wanyu, muupuwele. Hiyo khaninihimya hat'etthu yooirikanya yeeyo. Vaaloka. Masi, mwa Soolempwa, hiyo nimphwanya nipuro nimosa paahi, vaxhanle vaavo Yesu aareerihaly'awe, Mwaneene. Eyo kinoosoma, Apwiya yatthuna vale, mma—mMasuni va. Hiyo nimphwanya, mwa Luka Oowaarya e. . . Kookupali wira ti e—ekapiitulu 10, opacerya eversikulu 13.

Atthu akina yaanaaruha anamwane wa yoowo, wira aakwannye: nto awiixutti yaanaapwapwela ale yaaruha.

Masi Yesu voonalyawe etthu ila, aahinanariwa, nto khwaahimeerya wira, Mwaahiye anamwane ekirweeleke miyo, muhaakhoottiherye: okhala wira omwene wa Muluku ti wawaya.

Kinooleelani ekhweeli wira, Ole ohinaakhela omwene wa Muluku ntoko mwanamwane, khanikela-mo.

Nuumala aahaakuxa mmoononi mw'awe, khuwiixaatherya matata, nto khwaareeriha.

17 Kahi yoorerexa? Owo ohimnye wira, “Vano, mwaahiye anamwane ekirweeleke Miyo. Muhaakhoottiherye, maana wa yaawo, ale ntoko mwanamwan’ola, Omwene wa Muluku ti wawaya.” Vano owo aahaakuxa mmoononi mw’Awe khwaareeriha.

18 Vano, moota naarow’ahu otthuna, voosiis’ula, vaakhanle wira naamuwerya okhalana Yesu okilanthi-ene, ntoko mutthu, vaplataforma va, niiraka, “Pwiya, Nyuwo mwaamutthuna omureeriha mwan’aka?” Oh, etthu . . . vano maitho ahu eemutthu ni mirima sahu sinnitthuna woona yeeyo. Masi Owo ori vaava, nnakhala vo, maana Owo ooniruma wira niireke. Ni, ntoko siniir’ahu siiso Owo onnikupali. Hiyo naawaakhelaka ale Owo aarummy’awe, nimmwaakhela Ole omurumme, moone. Tivo, Owo ori vaava voosiis’ula. Nto Munna Gertie arwa vapiyaanoni woopa nsipo nahu na khalayi niipak’ahu okathi mmosa khalayi, nla, “Mwaaruuhe, mwaaruuhe axikhaani wa Yesu.” Kookupali wira nri muliivuruni mmo nipuro nlo. Nkikupalanxe. “Mwaaruuhe axikhaani wa Yesu.” Nto nyuwo mwaarineene mwanamwane, mwanamwane ohivahereriwe, ni munatthuna onvahererya voosiis’ula, vano, enookhala yooereera wira.

19 Nto aakhala arumeyi mpaani mu, alaleyi antthuna orwa okhala ni hiyo va okathi onaavaherery’ahu anamwan’ala wa Apwiya? Ninnoothapela okhala ni nyuwo, mwarwa vale. Vaareera, nookhala muliivuruni mmo? Moopwanya, Munna Neville? Khanikhanle. Vaareera, akavi ansuwela, *Mwaaruuhe?* Vaareera, nrowe niipe vano. Athu othene vamosa, aximaama yaaruuhaka anamwane aya. Vaareera. Vaareera.

. . . ruuhe, mwaaruuhe,
Mwaakumihe vapuwani v’etampi;
Mwaaruuhe, mwaaruuhe,
Mwaaruuhe awo ooreerexa wa Yesu.

Mwaaruuhe, mwaaruuhe,
Mwaakumihe vapuwani v’etampi;
Mwaaruuhe, mwaaruuhe,
Mwaaruuhe axikhaani wa Yesu.

20 Nuurame miru sahu okathi vakhani. Tith’ihu a Wirimu, emurukurenrye-ene altaari voosiis’ula amphwanyaneya aximai n’axitiithi evarenleene sooyara saya sikhaani mmoononi mwaya, Nyuwo mwaavahaly’anyu n’ureera wanyu murima. Awo

khanreere oxukhuru mwaha wa yaawo, Pwiya, ni anaaruuha va waltaari voosiis'ula, mpaani mwa Muluku, wira yaavahererye, oruuha ikumi saya wa Nyuwo. Nyuwo muhaavaha. Ni hiyo ninvekela, Muluku, wira Nyuwo mwaalyihe ni mmureerihe khula mmosa a yaawo. Mwaahoolele, ni Malaikha ookhapelela a Muluku emusuke khula mmosa. Mwaavahe ekumi yoolekela y'othhapa n'utteeliwa murima. Yinnuwase wira ekhale alopwana n'athiyana a Muluku, a meelo, nakhalaru nihiku na meelo.

²¹ Muluku, hiyo ninvekela wira Nyuwo mwaakhalihe alaleyi ni maprofeta ni awiixuttihi mwa nikhuru nla n'anamwane amurukurenrye altaari voosiis'ula. Ni wira hiyo nuuluwala vale ni nihinawerya okelela ohoolo, mutthu orin'awe onikuxa okhuma nipuro mpakha nipuro, wira niwerye ophwanyaneya niiwaka Ehapari yooreera yoolaleeriwa n'ala arisa va olelo. Munivahe, Pwiya. Ni nihiku nlo noovuwa sothene samalaru, ikumi sahu simanleene, axitiithi ala waltaari, nikhale ntoko Yakope a khalayi okathi owo aareerihaly'awe an'awe othene khwaaleela ele yaarowa okhala emalelo aya mahiku ookiserya. Vano awehaka osulu, khwira, "Moosuwela, wira kinoorowa othukumanyiwa n'atthu aka." Nto nihiku nlo noovuwa, owo ni osuulu awe wothene, anoorowa othukumanyiwa vamosa mmuttettheni wooreera. Khivanxankiha Palaamu iiraly'awe, "Emalelo aka ekhale ntoko yawawe." Muluku, kinvekela wira Nyuwo muvaherye iparakha iya w'axitiithi awo.

²² Nto vano nirowaka owiixaatherya matata, xeeni—oreera xeeni. . . Ni moota Nyuwo mwiiraly'anyu yeeyo voviiyeviha, Pwiya, wira hiyo atthu a mulaponi mu nikhalanane oreriwa wo waareeriha axinamwane axikhaani mwa Nsina Nanyu, nисуwelaka ela, wira, envekel'ahu, hiyo ninnivahiwa. Nirowaka waareeriha, Yesu, Mutthu ule ohinooneya voomalela, Ole oowerya sothene akhale vakhiviru amureerihe khula mwaana okathi oniwiixaathery'ahu matata ni omuvaha Yoowo. Vano ninvekela mwa Nsina Nawe. Amen.

²³ Munna Glenn Funk, owo ookhalana axinamwane awe axikhaani araru wira evehareriwe w'Apwiya.

[Nipuro vahiitthu mufiitani. Munna Branham onaavahererya anamwane—Mol.]

. . . e—ekatthi yaamukhaani, iwe epannte enkela epheyo, Nyuwo mwaahikilaiherya mwaan'ola. Tithi, iparakha Sanyu sikhale mwa yoola.

Joseph, mwan'aka, miyo kinnoovahereryani wa Muluku. Ni ekumi anyu ekhale eparakha. Mukhale profeta, Joseph. Mahala a Muluku ekhale mwa nyuwo. Muluku a tith'anyu, Pwiya Yesu Kristu, ooreeriheni mahiku othene, okhalihe makhalelo anyu eparakha w'akina.

Mwa Nsina na Yesu Kristu, miyo kinnimureeriha. Amen.

[Nipuro vahiitthu mufiitani. Munna Branham onaavahererya anamwane—Mol.]

²⁴ Munnaaphenta axinamwane axikhaani? Yookhala etthu y'axinamwane wira khula maama onttuna wira mwan'we areerihwe.

Vano, ti siiso Atith'ihu a Wirimu ary'aya wa hiyo aalweene voosiis'ula. Awo antthuna wira khula mmosa a hiyo areerihwe. Awo anninooniherya etthu emosa, anooninnya yeeyo paahi, ntoko wira, “Va, Miyo kintthuna wira mureerihwe, mwan'Aka.” Awo kahi ooreerexa? Tivo ninoowerya waaxukhuru Atithi a Wirimu siiso.

²⁵ Vano, mwa waareeriha axinamwane axikhaani, moosuwela, miyo kaamusoma paahi va mwa Yoolempwa nihiku nlo, nipuro nimoso va, waari mwa Waataana Wa Khalayi, wira, etthu emosa yuulupale miyo—miyo kaaphwanyaly'aka maana osoma. Ela eri va, vaava va. “Vano Natanayeli aahimuhimeerya Davidi, ‘Mwiireke sothene siri vamurimani vanyu, maana Muluku ori ni nyuwo.’” Munnona? Mwiireke eri vamurimani vanyu. Nto imaara sinci-ene miyo—miyo koottemulela ela, mpatthani muKristu, wira kinnihimyaka itthu kihisuwelaka etthu kaalavul'aka, khuphwanya wira enimwiireya. Etthu enihimy'anyu!

²⁶ Yaahihimmwa emaara emosa wira, Yesu aahikhuruwa vamwaako nto Owo khoona mwiri mmosa wahaarina etthu mwa yowo, mataakhuru paahi, ni khiwaakhanle hata muhokorokho, nto Owo khwira, “Ohikhale-tho onlya mihokorokho s'awo.”

²⁷ Vano mmeeloni mwaya, eviraka vaavale, arummwa yaahoono wira mataakhuru yaahuuma. Owo khwira, “Moone moota mwiri waakuvaly'aya wuuma.”

²⁸ Yesu khwira, “Mmwaamini Muluku; okhala wira sothene muntthun'anyu, mwaavekeleka, mwaaminiki wira munimwaakhela munoovahiwa. Ni sothene munihimy'anyu, munookhalana enihimy'anyu.” Nkuupuwelani yeeyo. Oh! Nto alakela olelo, Eroho Yowarya yuulupale ya Muluku, emphwanyaneya vaava valtaari, nyuwo muniira...Ahe, khentthuneya ophwanelihiwa. Khentthuneya okhala nipuro nuulupale noolokihwiwa.

²⁹ Yakope aahipurula nluku nimoso emaara emosa khuphiteeriha muru awe vaavo, nto nlo nlelo ninnisuweliwa olelo ntoko Nluku na Scone. Ahiiso, Nluku na oScone, atthu aalupale a mulaponi ankux'aya nluku nenlo, wira mamwene erapihiwe omwene vasulu va nluku nenle, nluku pure paahi na khalayi naari vapuwani.

Peteli naari nikuttha na maluku paahi nimoso vasulu va nikhw'aya, nto khukhala empa ya Muluku, nipuro n'okhala. Yakope khwira, “Nla khanihiyo nipuro nikina woohikhala empa ya Muluku.” Nikhuttha na maluku paahi nimoso vasulu va nikhw'aya.

³⁰ Khasinthuneya itthu suulupale soolokihiwa. Ontthuneya wiiyeviha ni waamini wira mwaamini, t'itthu entthuneya. Ti yeeyo eniira.

³¹ Vano, nisuwelaka wira okathi onvira voowaakuveya, nmimwiilipiha wira nihoopisiheni vanci-ene, nisuwelaka wira vaaviha ni ekereja khereere osareiwa. Tivo kinrowa olavula ni nyuwo okathi vakhani paahi voosiis'ula, mwaha mmosa va khino... Kinniroromela wira onoorowa okhala mukhaliheryo wa nyuwo. Nto vano miyo, 'kihinatthi okhuma owaani, koolepa itthu tthaaru wala xexe sikhaani. Miyo khwira, "Kinoolipelela koone etthu Apwiya arin'aya wira kihimye kaphiya iwe." Miyo khulepa itthu soophiyaka thanu na mosha va sikhaani, myaha sikhaani, nto khulepa emosa, khuhela mpoolosani mwaka sa. Miyo khuupuwela, "Ahe, kaphiya vapulpitu khino Awo anookileela etthu y'ohimya." Vano kiri ottaiwenexa siiso ntoko saary'aka iwe. Tivo, nnakhala vo, kinoosoma Yoolempwa emosa va, Apwiya enikhaliherye wiiwa saana Yeeyo. Kapiitulu 14 ya Luka Oowaarya, nto nrowe nipacerye ya miloko mirarau-... eversiikulu 31 y'ekapiitulu 14 ya Luka Oowaarya.

Wala mwene t'ani, oniira aarowaka owana ekhotto ni mwene mukina, khuhipacerya okilaathi, khuupuwela oratteene wakhala wira n'atthu ikonto muluko onoowerya orowa okumana n'ule onrwa omutuphela n'atthu ikonto miloko miili?

Ahiiso, owo oryeene... nlelo oryeene ottaiwene, owo onimwaaruma anamitthaka, ovaanela murettele.

Siiso, khula mutthu a nyuwo... .

³² Kintthuna wira nwehe oratteene. Vano, yoopacerya Owo ohimmye wira... Nlo nlikanyiho. Owo ohimmye wira, "Vano, ookhala mwene onoorwa, nto orina anakhotto ikonto miloko miili; nto mwene *ola* onrowa okumana ni yoowo, nto owo orina anakhotto ikonto muloko paahi. Vano nto, yoopacerya, owo onookilaathi khukoha sinto oolikana, sinto onoowerya wira wala nnari." Vaareera.

... a nyuwo ohinihiya sothene sirin'awe, khanwerya okhala mwiiicutti aka. (Munnona?)

³³ Vano Apwiya yincererye iparakha Saya mwa Masu ala. Vano nuurame miru sahu okathi vakhani paahi.

³⁴ Tith'ihu a Wirimu, Nyuwo Ole munuwela itthu sothene, ni muhiniweha omutthu wa mutthu, tthiri mutthu ti pani Nyuwo mukhanly'anyu oomuupuwelaka? Nyuwo moomuupa mutthu, owo onlikana n'ithutu ya mmatta: olelo owo t'oreera, meelo onoothikiliwa, khuriheliwa muttukutthani, vano onoonyaala. Nto kinoovekelani Nyuwo, Muluku, wira munimorele ikharari olelo ni mmuhiye khula mmosa aalikele olelo. Hiyo nri va ntoko empa y'ottharuxiwa-mo. Hiyo nri va wira niixutte ni nisuwele moota w'okhala, nto eyo ekhume mwa Masu Anyu olelo, O

Muluku Ohinimala. Anciene a an'Inyu annithukumanaka, ni anciene aya an'Inyu mwa iyaakha sinciene, masi, ntoko yaawo, hiyo othene nintthikela mpaani mwa Muluku, wira niixutte, nisuwele. Nto miyo, murumeyi Anyu, kintthuna osuwelaxa sa Nyuwo. Ni kinvekela wira Nyuwo muruuhe muupuxeryo wa Ehapari yooreera wa hiyo othene, mwa murumeyi Anyu, ni wira Mukhalelo Anyu, ni muupuxeryo wa hiyo mpaani mu mothene, okhale muulupale olelo, wira nikhume, mmurimani mwahu, nitthunaka okhala arumeyi Anyu oolokaxa, wira ekhale ya fayita wa hiyo okhala va. O Muluku oomoriwa ikharari, munivahe iparakha iya mwa Nsina na Yesu Mwan'Inyu. Amen.

³⁵ Vano Apwiya yincererye iparakha Saya mwa Masu okathi onso'ahu. Kintthuna kikuxe yoosoma voosiis'ula, ele, "Iroho soowootoha ahiiso Masu a Muluku?" Vano, mwaha mmosa wootikiniha vakhani, masi okhalaka wira mutapernakulu. . . Nto Namararu evinre. . . Ettiminku evinre voosiisu kaalavula mwaha wa xu—xupileewu mwaamukhaani a Ehapari yooreera.

³⁶ Ni Namararu evinre ohiyu kaalaleya mwaha wa muthiyana aarina e—ekhara mmuruni mw'awe, wala e. . . Owo yaaroomurimeela iliivura sawe, nto owo aamuvela mpa athunaka ophwanya 'aiy'awe ehinatthi orwa. Vano noophiyerya osuwela wira muthiyan'ole aari enamuna emosa ya muthiyana a epante enkhuma nsuwa, ni owo. . . ni aathonyerya Ekereja. Ni khaawariwaka anela oothelana mukathani. Yaawariwa mmuruni, ni iliivura thanu na xexe mwa yeeyo. Nto okathi muthiyana aakhal'awe namuttompe, yaakumihiwa eliivura emosa y'eparatha yooniherya wira aari namuttompe. Nto siiso muthiyan'ola yaahimupweteya emosa, kahi namuttompe. Masi aiy'awe yaarookhuma, nto owo aatthuna waakuva wira aphwanye iliivura eyo, wira ahokoloxerye mukharani mw'awe, maana aiy'awe yarwa vale yaamusuwela wira owo aahiphwanyiya araruwaka, nto eyo yaahimya okurumuwa w'ethoko ni siiso. Nto miyo kaahihelela yeeyo ekereja okathi vakhani, yoopwetexa itthu sinciene suulupale. Nto ola okathi w'Atithi orwa, tivo nihaana waavya. Vano, nisuwelaka mukereja, ni mutapernakulu mwahu. . .

³⁷ Nto miyo—miyo kintthuna olavula mwaha wa *Iroho Soowootoha*, yoowo vekeekhai onrowa wiihaniwa *Oxutta s'axetwani*. Vanniiwanyeya vanci-ene ohimmwa axetwani, mahiku ala, masi muniwa vakhani moota wo wiihuluxa yaawo. Hiyo othene noo—noosuwela saana wira aakhala axetwani, masi, etthu enttharelana t'ila, moota wo wiihuluxa etthu ene yeeyo. Nto vano yookhala. . . Nikhalanaka, ni mahala a Muluku, oreeriwa wunci-ene w'okumana n'itthu seiya siniihaniwa axetwani, ni okumanana vaplataforma ni mweettelo wa khula nihiku, ni, vano, kaatthuna kiwehe mwa Soolempwa voosiis'ula kisuwele paahi itthu xeeni iyo.

³⁸ Vano, hiyo ninnihelelaka yeeyo mmutekoni mwa ovoniha, kweekwe mpantte wa ovoniha. Kankuru, nipotthe, mwaana a niitho, elapaha, itthu iyo sothene khasihiyo itthu s'ephattu, iyo ti soovikana soopattuxiwa ni t'axetwani. Yoolempwa ennilihipherya yeeyo voowooneya. Masi awo t'axetwani mw'erutthuni, ni mapotthe, ntoko kankuru, arina ekumi mwa yaawo, nto ekumi ya yeeyo xetwanii. Nipotthe na mwaana a niitho, omwareya wa elapaha, n'iretta sikina, t'axetwani. Owo mukhalelo w'erutthu.

³⁹ Vano, voosiis'ula ninrowa olavula—olavula mwaha w'axetwani mwa mukhalelo wa erooho mmunepani. Awo ankhala mmunepani siiso ntoko ankhala'aya mw'erutthuni. Vano ninrowa okupali wira ninniwoona mw'erutthuni mw'atthu, ntoko akankuru ni—ni iretta soohiyana-hiyana siri mw'erutthuni ya mutthu.

⁴⁰ Naanaanoxa va, hata kankuru oohimmwa wira eretta ya mphimo wa neexexe, wira ori mphimo mukina. Vekeekhai, iwo oxutta s'axetwani. Khula eretta eretta ya mphimo wa neexexe, opacerya waya.

⁴¹ Vano, masi vano kankuru mw'erutthuni wala kankuru mmunepani, xetwani onniwerya okela mwa khula nimosa wa mapuro awo. Vano, sookhala imaara sinci-ene n'atthu anci-ene arina miyuupuwelo sooreera a...ni atthu ooreera murima aneeserya imaara sinci-ene o—omumula vasulu va teyoloxiia mwaamukhaani awo arin'aya, wala etthu awo yiixuttihiw'aya okhuma enamwane, ni nlelo aniphwanyana wira mmukhaleloni mw'aya, vathi mmunepani mw'aya, wira nlelo aakhalana etthu ehikhanle saana. Nyuwo, anci-ene ari vaava voosiis'ula, vekeekhai nipuro pi nipuro amphwanyaneya aKristu ethukumanne vamosa, anniphwanyaneya atthu arina irooho seiyo mwa yaawo, wira awo...Ti yoohitthuneya. Awo khandthuna iyo. Aniira, "Oh, vaakhanle wira kaamuwerya paahi ohiya wootha! Vaakhanle wira kaamuwerya paahi ohiya okhalela ithaama! Vaakhanle wira kaamuwerya paahi ohiya *ela*, wala *ele!*" Vano, awo t'axetwani. Nto, vano, awo anoorwa mwa mukhalelo w'etiini, imaara sinci-ene. (Okhalaka wira exikola ya Ttiminku, okathi wo wiixuttiha, vano nrowe niwehe mwa yeela.) Vano, awo anoorwa mwa mukhalelo w'etiini, imaara sinci-ene.

⁴² Vano, mwa Yoolempwa, emaara emosa, aahikhala mulopwana mmosa iihaniwa Yehosafati, mutthu muulupale, mutthu natiini. Nto owo aahirowa wa mwene mukina yoowo aari mwene a—aIsarayeli. Vano owo, Yehosafati, ory'ene mwene a Yuta. Vano owo aahirowa mpakha w'Akhabi, mwene a Isarayeli, nto awo khwiiraana, khupaka mwiiwanano mmosa ni mukhw'awe, wira erowe yawane ekhotto oRamothi w'oGalaadi. Vano awo yiirale eyo ehinatthi ovekelala toko.

43 Oh, vaakhanle wira atthu yaamuwerya osuwela! Tivo miyo kirwiiy'aka voosiis'ula khoovekelani wira mukuupuwele okathi onrow'aka ilapo s'okhopela. Mwa sothene, nvekele!

Ookhala mutthu aarwiiye nihiku nlo khwira, “Munna Branham, munoona wira ti yoovonyeya wira etthu khata?”

44 Miyo khwira, “Munikohelani?” Munnona? Yakhala yookoha mmuruni mwanyu, muhiye meekh'aya, muhiire nnakhala. Mukhale ni yeeyo tu. Mwapacerya wira etthu p'itthu, nto wakhala waanyiherya sinto ti yooreera wala yootakhala, mukhale ottaiwene wa yeeyo. Muhiikelihe mwa yeeyo hata vakhani, nto munoosuwela wira muri saana.

45 Vano, sothene saahaana otthokeleliwa ni mavekelo, toko. “Mphavele Omwene wa Muluku toko n'ixariya Awe, vano itthu iya sikina sothene sinimuncereriwa.” Miyo vekeekhai kookupali voosiis'ula wira, vaakhanle wira alopwana n'athiyana yaamuwerya ophiyerya nipuro vaavo munep'aya, muupuwelo aya, mweettelo aya, waarow'aya okhala wooloka vamaithoni va Muluku, eyo yaarowa okhala ekereja emosa yooweryaxa etonko okhala.

46 Nkawehani okathi vakhani paahi mwa erutthu. Vano, hiyo nri, ninnikhalana, imaara sinci-ene, soovira iyaakha, nookhalana ele eniihan'ahu, “yoowuupulula soowootha.” Nyuwo pooti ohela munresani mwanyu, ohela epantte n'ipantte ya yawaya—muru aya, ni nyuwo pooti okhala vale ni weererya vooreera enwery'anyu wira mukhalihe etthu yoowootha okhala ntoko ekeekhai, eyo enrowa othoonyerya vookhotta khula okathi, okhala wira mutthu khopakiwe wira ootheke. Wootha etthu yoowoka, etthu yoolipa, etthu yootakhala. Kinnamputi okhalana namuhapaliwa ni miyo, khula nihiku, ohikhanle nawoothe. Munnona? Nawoothe! Nto erutthu anyu khepakeliwe wootha. Hata mukhalaka natampi moota xeeni, nyuwo nlelo mwa mwaana a Muluku omonre. Mutthu ootepexa okhala natampi epoom'ela olelo, khiwaari otthuna wa Muluku wira mukhale natampi. Owo aatthuna wira mukhale mwaana mulopwana wala muthiyana a Yoowo. Nyuwo mupakiwe mwa mukhalelo Awe Yoowo. Masi etampi yoowiirihani wira eyo. Nto khivancala moota xeeni muneerery'anyu otakiha ni weererya okhaliha wootha okhala ntoko wooloka, yookhala ekaruma ya siyensiya enooniherya wira ti yoovonyeya. Nyuwo pooti ohimya n'ixariya yothene munthun'anyu ohimya-no, masi nlelo enrowa wooniherya vookhotta; okhala wira wookhala muupuwelo wa vathi muhina mwa mutthu, nto muupuwelo yoowo wa vathi onnisuwela ele ekhanle ekeekhai. Ni hata wira munihimyani ota nno, muupuwel'ole wa vathi onnisuwela wira wootha, ni onrowa wooniherya muupuwelo wa vathi.

47 Tivo, vaakhanle wira mulopwana wala muthiyana yaamuwerya ophiyerya okhalana miyuupuwelo saya, ni

onamoona aya ni makhalelo aya oolikanexa ni Muluku (amen) mpakha mukoti wa Eroho Yowarya okhala mmosa voolikane-ene ni Muluku, exeeni yaarowa wiiraneya! Vaakhanle wira mulopwana ni muthiyana yaamukhalakhala eweryaka wiilokiherya, vaavo ni otaphuwa onkhuma mmurimani mwaya, ni waamini onkhuma muhinaxa!

⁴⁸ Atthu anci-ene anoorwa waltaari wira evekeleliwe, awo arina waamini w'ankhili. Awo anoolapa itampi saya khwitakanxa n'ikereja, ni waamini w'ankhili. Awo anaamini muu—muupuwelo aya. Awo anaamini okhala wira arimwiiwa. Awo anaamini okhala wira aasuwela wira ekano yoomalela oreera. Masi kahi yeeyo Muluku onweh'awe. Owo khonweha waamini wanyu w'ankhili.

⁴⁹ Owo onweha vamurimani, memmo muhina mwaya Muluku... Nto waakhumaka mmurimani, sothene sinniweryaneya nto. Soohimya sanyu sinnilikana ni makhalelo anyu. Makhalelo anyu annilavula vanci-ene siiso ntoko soohimya sanyu.

⁵⁰ Masi soohimya sanyu saahimiyaka etthu emosa, nave makhalelo anyu khunakhala ekina, yookhala ehilonke nipuro nlo. Eyo okhala wira murina waamini w'ankhili, nave kahi waamini onikhuma mmurimani mwanyu. Ni eyo enooniherya wira ota, *nno*, ori omusuwela Muluku; masi muhina, *mu*, ori xetwani ahoveyaka. “Miyu kinnaamini ovoniha wa Muluku, masi kahi wawaka.” Munnona? “Ah, vaamuweryaneya okhala siiso, masi nkinaamini.” Munniiwa? Ota, muniira, “ayo”; muhina, murim'anyu oniira “nnari.” Etthu ene yeeyo ya siyensiya yaamurowa wooniherya wira khayaari t'ikeekhahi, yaamooniherya.

⁵¹ Nkawehani okathi mamwene ala, ehinatthi okhuma, awo yaahaana... Yehosafati hata ahinatthi ophiyerya opaka mwiiwanano ni Akhabi, owo aahaana toko wira, “Nrowe nivekele noone ole okhanle otthuna w'Apwiya.”

⁵² Mukithoonyerye mulaleyi mmosa, mukithoonyerye muKristu mmosa, mukithoonyerye muthiyana mmosa mwaneene etthoko okhanle muKristu, mukithoonyerye mulimi mmosa, wala namuteko a okaafirika, onrowa omuhela Muluku oopacerya mwa itthu sothene, miyo kinoowoonihani mutthu onrowa okhala ooxintta sikhlaneru sothene xetwani okhanly'awe ohelaka mwa yoowo. Owo onimphavela Muluku, toko. Hiyo nihaana okhalana toko. . .

⁵³ Masi awo khayiirale. Awo yaari othene ooriipiwa okhala wira Akhabi aarina omwene wookarya, ni aahiira itthu sinci-ene, ni aahikhalana itthu sawe suulupale sooreerexa, eweero awe ni eparatha awe, aari mutthu muulupale, mutthu a nsikhi, nnya mulipa-oohaamini.

54 Nto ti vaavo olumwenku ury'aya olelo. Ti vaavo Amerika omphwanyaney'awe olelo. Ti vaavo ikereja simphwanyaney'aya olelo. Hiyo ninteka ikereja sootepexa oreera sitonko otekiwa. Ninkhalana atthu ootepexa osoma nitonko ahu okhalana. Nimmwiixuttihi teyoloxiia oomalela oloka, ni sikina, ni wiixutta wiipa ntoko Malaikha, masi nlelo wookhala otteettheya nipuro nlo. Wookhala otteettheya, okhala wira otthariwe mwiixuttihi wa mutthu ni irooho soowootoha, ohiya otthikela Masu a Muluku. Awo aneererya okhaliha itthu olikana ni olumwenku. Eneereriwa wooniheryaxiwa yeeyo, ntoko Hollywood.

55 Nno nihiku nimoso, muromolelo mmosa woosuveliwa, wa muxovo wa Ehapari Yooreera oKansas City, wala, kileveleliwe, oDenver, vamuthukumanoni, onteka ekereja ya itolare emilyawu ntero. Ni arummwa imiya sene awehereryaka isentavo miloko mithanu sa muromolelo yoowo, wira ekuxe Ehapari yooreera yaaroihele apakawu. Etthu entthun'ahu olelo muhakalaliho wa muupuwelo wa omulaleyi, woovelelihiwa ni Muluku, wooyariwa ni Eroho Yowarya, onrowa okhalana wiivahererya wa Muluku, wira orowe wu mutakhwani ni onvarela etthu Muluku, ohiya oteka ikereja, suulupale ni otthuna waarya onvikana namwaattamanani.

56 Kaamwaamputi okokhorela mmisawuni, oveliwe-mo, wala musalawu w'epaare, n'ukhalana otaphuwa wa Eroho Yowarya ni ophenta wa Muluku ovihaka mmurimani, ohikhanle okilaathi ekatetrale yuulupalexa nrin'ahu molumwenkuni ni wunlaanihiwa ni miixuttihi ni makano aatthu. Entthun'ahu olelo muhakalaliho ontikinya, otthikela mw'Ekeekhai, otthikela-tho mwa Masu a Muluku.

57 Vano, okathi awo aronw'aya iwe, vaviraly'aya okathi Yehosafati khwiisuupuwela khwira, "Khokhanle . . . Ahe, nrowe naakohe Apwiya yeela."

58 Owo khwira, "Vaareera," Akhabi khwira, nto owo khurowa khwaaruha emiya, alaleyi imiya xexe ooloka owiixuttihiwa. Nto owo khwaaruha vale khwira, "Ala othene aya annilaleerya s'epofeta."

59 Vano naanaanoru khupacerya maxintta aya, khupacerya wiighana. Vano awo khwira, "Ayo, rowakani ni murettele. Apwiya ari ni nyuwo."

60 Vano nto nuumala othene ale imiya xexe okhalela onamoona aya wira awo yaahaana orowa ni murettele, nave Yehosafati asuwelaka . . . Munniwa saana? Moone, muhina mmurimani wa mulopwan'owo naxariya yaahikhala etthu yaamuleela wira yaahikhala etthu yahaalonke nipuro nlo. Yaahikhala etthu yaavonyeiye.

61 Akhabi khwira, “Vano nookhalana imiya xexe va, ni ni mwiiwanano mmosa, khula mmosa oniira, ‘Rowakani, Apwiya ari ni nyuwo.’”

Masi Yehosafati khwira, “Khamurina-tho mukina?”

62 Owo khwira, “Ahe, xeeni omutthunaka-tho mukina, nimanleene okhalana axilopwana imiya xexe oomalela osomaxa mulaponi? Othene aya aniira ‘Rowakani!’” Eyo yaari y’ankhili. Masi muhina mmurimani mwa Yehosafati owo aahisuwela wira yaahikhala etthu yahaalonke. Vano, owo khwira, “Nookhalana-tho mmosa, owo ti Mikaya. Masi miyo kinnimunyokha.” Khwira, “Owo kweekwe onihimya etthu yootakhala, ni opwapwela ohikhanle mwah’awe, ni oyeviha ikereja n’itthu sothene.” Khwira, “Miyo kinnimunyokha.”

Khwira, “Murowe, mmurowele, noone etthu enrow’awe ohimya.”

63 Nto varwiiy’awe Mikaya, owo khwira...Awo khwira, “Vano, nwehe, muhimyeke etthu emosaru ale akina ehimaly’aya.”

64 Owo khwira, owo khwira, “Miyo kinrowa paahi...” Ela eri va. “Miyo kinrowa ohimya paahi ele Muluku enihimya’awe.” Amen. “Hata wira maprofeta anyu anihimya exeeni, ni etthu *ola* enihimya’awe, ni etthu ekerej’anyu enihimya’aya, ni etthu awo anihimya’aya. Miyo kinrowa ohimya ele Muluku enihimya’awe. Muluku ohenle mwaano mwaka vano miyo kinrowa ohimya etthu Owo onihimya’awe.” Etthu entthun’ahu olelo ti aMikaya akina-tho anrowa ohimya ele Muluku ehimmy’awe. Nwehe, tivo awo khumuroiha iwe, nto owo khwira, “Kivahiwe ohiy’ula.” Vano ohiyu yoole Apwiya khikumana ni yoowo, vano owo khutthika voosiisu aya. Okathi mamwene oowanli yaaphwanyaney’aya vamukhora, owo khwira, “Muroweke.” Khwira, “Muroweke. Masi,” khwira, “Koomoona Isarayeli ntoko ipwittipwitthi simwareiye sibirina makhampusi.”

65 Vano mulaley’ula mmosa, oowara saana, khurwa khunvaha nlaathuma owanoni, khwira, “Eroho ya Muluku eronwe epantte exeeni n’ukihiya miyo?”

Khwira, “Munoosuwela mwatthika vale.” Ayo.

66 Owo khwira, “Mwiiwe va!” Owo khwira, “Hiyo n’arumeyi a Muluku. Hiyo nri imiya xexe, vano nyuwo muri mmosa.”

67 Masi Mikaya khwira, “Kinimooleelani vatthu vari mulattu anyu.” Amen! Khwira, “Kaahikhalana yoowoona.” Amen! Owo khwira, “Vano koomoona Muluku akilanthe-ene veehicieni Vawe. Kihoono muttitthi wa Wirimu waaphwanyaneya omurukurenrye Yoowo. Ni hiyo noosuwela wira Masu a Muluku annimuhimerya sootakhala mulopwan’ola, mwaha w’enamuna owo oniiir’awe.”

68 Khamukhanle oreeriha etthu Muluku otakhalinh’awe, nnakhala xetwani khokhanle otakhalihaka etthu Muluku

oreerinh'awe. Owo mwaha wa mutthu mmosa, vohicala moota ohaawaly'awe wala ohisuwel'etthu, moota ohiixuttaly'awe, moota ohisomaly'awe. Etthu Muluku oreerinh'awe ti yooreerihwa. Etthu Muluku otakhalinh'awe ti yootakhalihwa. Musuweleke ovirikanyihwa eri yooreera ni eri yootakhala.

⁶⁹ Mikaya aanisuwela saana wira ale khayaari Apwiya yaari n'alaleyi ale. Ahe, exeeni waari mulattu ene n'alaleyi ale? Nkawehani etthu yiraly'aya. Awo yaahiwarihiwa vooreera. Yaahilyihiwa vooreera. Yaahithukumana vamosa mmairani mwaya ni sikina, ni miyaataano saya, mpakha nipuro yaaphiyenry'aya omusuwela teyoloxiyya aya paahi. Nto Bibilia ohimmye wira Mikaya, okathi waaweh'awe yoowoona, owo ohimmye wira, "Muluku iirale, 'T'ani okhanly'ahu omuruma vathi vale omootooha Akhabi?" Vano erooho yoowootooha khwira, 'Miyo kinoorowa vathi vale kamuwoke Akhabi mw'alaleyi ale, wira emwiirihe Akhabi orowa iwe, wira emaliheriwe Masu a Muluku."

⁷⁰ Vano, olelo atthu anci-enexa aniiwa... (Vano, exikola ya Ttiminku, miyo okisivela.) Nkawehani, atthu anci-enexa aniiwelela irooho soowootooha ohiya okuxa Masu a Muluku. Irooho, siri mulaponi. Awo t'axetwani. Nto iyo sinoorowa mapuro n'ukela eriyari y'atthu, arumeyi. Iyo sinnikela eriyari y'atthu a mukereja. Iyo sinnikela eriyari y'atthu ooreera murima. Ni sinnaakhalihwa oowootoohwa. Ni annihimya itthu, ni wira itthu, ni wiixuttiha itthu, ni ovara itthu, siri soovirikana ni Masu a Muluku. Olelo, arumeyi a mmuthukumanonni mwaya annaatthuniherya atthu aya ottikha iturufu mukereja, anci-ene aya. Vano, awo othene kahi aKatolika, aakhala Maprustante anci-ene aniira yeeyo.

⁷¹ Etthu aneerery'aya wira oranttelihwa etthu. Aneererya okhalihwa mutthokiheryo musya. Aneererya okhalihwa esomelo, wira eranttele nipuro na Eroho Yowarya. Khamunkhalakhala nweyaka wira yeeyo, hata wira mutthu anyu osomme sayi. Kinoona wira etthu yooreera owo okhala osoma. Masi aahikhalane Eroho Yowarya ni yeeyo, osoma wawe khommuphwanyihwa mureerelo. Osoma khunkhalakhala okuxaka nipuro na weettiherya wa Eroho Yowarya. Amen.

⁷² Nwehe, awo, ohiya Yeela, awo aneererya okhalihwa ovahana ntata nipuro na musuwelelo wa khalayi naakhalanak'ahu. Olelo ekereja enikhala ya naanaano. Awo animoorwa n'uvaha ntata naya noolopwana n'epatthani, ni ti siiso awo aniir'aya. Masi khenkhalakhala ekuxaka nipuro n'ekhekulu no wunla-vo vaavo anatampi yaavekel'aya ni wiilikanyihwa ni Muluku. Ti yeeyo.

⁷³ Olelo awo aneererya okumiha nipuro na sanamuluko sa Muluku. Awo aneererya okhalihwa etthu. Aneererya okhalihwa yoovirikana. Awo anoorowa n'ukhalana acuuku mukereja, ottikha ilotariya. Ilotariya khasinkhalakhala sikhalka

voopuroni va sanamuloko sa Muluku. Solya s'ohiyu, otumiha mikhumi, orukuneya, wira ophwanyuwe musurukhu w'oliva olokihiwa woohiyana-hiyana, eyo khenkhalakhala ekuxaka nipuro na sanamuloko ni soovaha sa Muluku sa Mahiku othene. Khenkhalakhala yiraka. Masi nlelo nineererya wira yeeyo.

⁷⁴ Exeeni iyo? Iyo irooho soowoototha sinkhuruwa, sineererya oran-...oranttelihā etthu ni Masu a Muluku. Muluku khorina hata etthu y'oranttelihā Masu Awe. Awo t'Ohimala ni a mahiku othene. Muluku khorina hat'etthu y'oranttela waamini. Waamini khorina hata y'oranttelihā. Nroromelo khonkhalakhala okuxaka nipuro na waamini. Waamini ori meek'haya. Owo onkhala meek'haya. Khonkhalakhala okuxaka e...Nroromelo khokhanle okuxaka nipuro naya nnakhala. Nroromelo t'ikeekhayi ya itthu sinweherery'ahu, t'usuwelaxa itthu sihinoneya, ahiiso waamini, kiireke. Munnona? Nroromelo etthu emosa; waamini ekina. Nroromelo onoolipelela; waamini wookhalana. Omosa waamini w'ankhili; nto okina muupulolo onkhuma wa Muluku. Khonkhalakhala okuxaka opuro aya. Hiyo nineererya, masi ninkhaliha sooranttela iya sothene.

⁷⁵ Nineererya oteka ikereja suulupale ohiya waaruma arummwa. Yooranttela ekina. Yesu khonamurumeke mutthu oteka ekereja. Khenarummweke mBibiliani. Hiyo ninteka iseminaariyu, eroohiwa eyo okhala nipuro na murummwa. Hiyo...Yesu khonanihimeeryeke wira niteke eseminaariyu. Khiva mulattu ni seiyo. Osoma, weererya wiirihā yeeyo okuxa nipuro. Khonkhalakhala okuxaka. Oruma wa Yesu waari "orowa mulaponi mothene waalaleerya Ehapari yooreera atthu othene," wa okathi wookiserya. Tivo sooranttela sothene sirin'ahu khasinkhalakhala sikhālaka nipuro na ele yooloka.

⁷⁶ Nihiku nlo kaahikhalana musuwelelo, yoranttelihā. Kaahikhalana owereiwa woopacerya niino, kaahaana okumihiwa niino nimosā. Voosiis'ula kirina niino noohikhala niheliwe-vo. Nkinwerya olavula. Nlo khaninkhalakhala niranttelaka nle n'ekeekhai. Nnari, mulopwana! Oh, wulu!

⁷⁷ Nyuwo pooti omukuxa mutthu khunwarihasa, omupaka a mwiri, exiixi, etthu p'itthu enthun'anyu, n'umupaka orateenexa. Owo khorina moonelo, hata muupuwelo. Owo khonkhalakhala akhalaka nipuro na mutthu eekeekhai. Nnakhala orukunxa murima woowoohererya onoorwa ni wira, "Kihitakanxa n'ekereja. Kinimweererya wiikhaliha ooloka." Eyo khenrowa okhala nipuro na orukunxa murima wooloka wa enamuna ya khalayi, oveleelihiwe ni Muluku, wa Eroho Yowarya ommukhalihā mutthu oovirikana mmurimani mwawe. Khokhanle wira, okhala wira khiivo Ekumi mwa yoowo. Khiivo hat'etthu wira envahe Ekumi.

⁷⁸ Nno woohikhala khalayi kaahimoonā muratti mmosa muuluaple aaruuhale ela, kaatthuna wira, namapattha, opanke

elatarato ela ya Moise. Nkinwerya wuupuwela nsina nawe vano. Owo muratti Mukreku. Yaatthunanen'ye ekumi awe. Vano vapakaly'awe mpakha ophiyererya wuupuwela wira yaari yoolokaxa, owo aari woomuuma owanoni mwaha w'olikana ni Moise, mpakha omana vanikuthani vaya, khwira, "Mulavule, Moise!" Yaakhala ntoko y'ekeekhai! Eyo yaapakiwe volikanexa mpakha yaakhal'aya ntoko Moise, mwa wuupuwela wawe, mpakha omana ni martela wira okhalihe okhalana moonelo.

⁷⁹ Enuupuweliha ekereja. Hata wira munaakakhanya kavi, munnuwelo xeeni wa muromolelo munkhalan'anyu, oratta xeeni muniip'anyu isipo sanyu, erattelo xeeni muthukumano anyu oniiwaarih'aya, eyaattelo xeeni murin'anyu *ela, ele*, wala *ekina*, nyuwo pooti omana, woona, etthu p'itthu. Khenkhalakhala ekhalaka nipuro na Ekumi, mpakha Kristu akhuruwe mwa mukhalelo wa Eroho Yowarya, mukereja mmo, ni woovahani musuwelelo musya wa oyariwa-tho vasya. Khenkhalakhala ekhalaka nipuro na Masu a Muluku. Masu a Muluku ankhala meekh'aya.

⁸⁰ Mikaya aarina Masu. Owo aahisuwela wira aahikhalana Masu. Owo aarina Masu yaalempwe, owo aahikhalana Yaawo mwa yoowoona. Owo aahisuwela etthu Muluku aahimmy'awe muhina mwa Masu Awe. Aahisuwela etthu Muluku aahimmy'awe ni yoowoona. Soopiili saanilikana. Owo aahisuwela wira yaari Ekeekhaii, tivo khoovale.

⁸¹ Masi erooho ela yoowoototha, nkawehani etthu eniir'aya, olelo. Wira ekhalane atthu anci-ene a mukereja, wira ekhalane atthu oolokaxa a mukereja, eyo enoovololiha mwiixuttiho wothene wa khalayi wa Eroho Yowarya. Ehaatthuniherya alopwana okhalana maira eepatthani mmosa ni mukhw'awe, vathi vale memmo anaattikh'aya a musewe. Eyo khenkhalakhala eranttelaka empa y'osulu, weiwo awo yaavekel'aya Eroho Yowarya. Ehaatthuniherya athiyana othukumana n'uhimya ipwerwa n'itthu siiso, n'ukhalana ithiru sinci-ene sihira naata. Eyo khenkhalakhala ekhalaka nipuro na muthukumano wa mavekelo. Athiyana, enamuna ankhum'aya ni owara olelo, ti—ti yoowuliha muru.

⁸² Kihiiwa mutthokelelo Munna Neville aarin'awe, khwira, "Aatakhaliwa atthu a wAmerika," khwira, "arooveleeliha ikuwo saya sothene ilapo s'okhopela." Ti yeeyo. Awo aneettasa iwo n'ikuwo saya sa muhina. Awo...Ti yeeyo. Siiso awo yaavahaleene arummwa, okhala wira arummwa...Atthu n'apakawu ilapo sikina anwara seiyo. Atthu ala anetta ehirina, enkhala ntoko ennaasivela yeeyo.

⁸³ Kinimooleelani, yookhala etthu ehononiwe, ni elaleeriwo ya Ehapari yooreera ya Pwiya Yesu Kristu. Awo t'axetwani anoorulani ikuwo sanyu. Aari mutthu mmosa paahi mBibiliani aatonko oruliwa ikuwo, owo aari mulopwan'ole aavariwe

axetwani. Vano olelo owo onoorwa mwa enamuna yoomaaleleya, ntoko wira t'opatthani, ntoko wira t'oreera murima, ntoko wira sothene siri saana. "Okathi ti wooriirya, ni enimookhalihani oovirexa ettheke mwarularu ikuwo sanyu." Alopwana aneetta erowaka nno ni nno vapuwani, nuusu epwitipwiti, n'athiyana ti siiso. Vano, murookela mukhalelo mmosa vahikhanly'ayatho nttittimiho onkhalaniwa n'alapwa, mmosa ni mukhw'awe. Mulattu aya xeeni? Nkineererya wooveehani. Kintthuna paahi wooleelani wira onkhala ovariswa xetwani, ni wira muniwelela irooho soowootooha sinooleelani wira, "khiva mulattu," masi woothiwa.

⁸⁴ Enuku y'etriku enoorowa okumiherya etriku paahi. Nyuwo mwaari muKristu, khamuniira eyo. Khamukhanle wira. Khamukhanle wira tu. Nyuwo murina waamini w'ankhili ni wira, "Munna Branham, miyo kinnimwaamini Bibila." Makhalelo anyu annihimya wira khamunimwaamini. Amen. Irooho soowootooha sinvirikanya Masu a Muluku.

⁸⁵ Owo aanisuwela vattu vaary'awe, Mikaya aanisuwela. Owo aarina Masu a Muluku. Owo aari mutthu oohisuweliwa saana. Khaavo aasiveliwa n'uwo okhala wira owo aahimya Ekeekhahi, anamwi awo yaasiveliwa n'alaleyi ala.

⁸⁶ Vano, etthu ekina eniiraneya. Miyo kinnaamini ni kinoona wira khula mulopwana orina musuwelelo ni Muluku, wala muthiyana, ookhalana etthunelo y'okhala oowuukhuwa vakhani. Miyo kinnaamini iyo vekeekhai. Eyo Ekeekhahi. Masi moosuwela? Awo akhalinhe itthu soowuukhula nipuro na opatiiso wa Eroho Yowarya. Awo anooyakula vancipale paahi, nave khiivo hat'etthu mwa yeeyo. Mukhaleke ooreera murima siiso ntoko munkhal'anyu oonyakula, vano munookhala saana. Wuukhuwa vekeekhai khiva mulattu; "miteko sinkhomaaliha erutthu efaitha aya eri vakhaani." Masi irooho soowootooha sirookela munikhuruni mw'atthu a osantu, ni khwaakhaliha oomumula wira "okhala wira annikhuwela" wala "okhala wira anniina, okhala wira annikhalaha eyuukhuwelo."

⁸⁷ Mulopwana mutokween'ole iwe, mukhulupale a maprofeta ale othene, alaleyi, owo khaareere okupali wira aahikhalana exariya, mpakha wiipakela manyaka manli ni khwiinasa vale, khukumiherya munyakunyaku muulupale. Owo aarowa waakhanyererya anakhotto akina a Asiriya okhuma elapo ele. Masi waari woothiwa! Masu a Muluku yaahimiyale voovirikana. Amen. Moone, nyuwo pooti okhalana exariya voowuukhuwa, mwakhalanaru enamuna yoowuukhuwa yooloka otulli waya, enamuna yoowuukhuwa yooloka eneettiherya wuukhuwa wanyu.

⁸⁸ Davidi aahiwiinela Apwiya, nto amwaar'awe khimutheya. Vano Muluku khuweha vathi okhuma Wirimu, khwira, "Davidi,

nyuwo mwa mutthu onthariha murima Aka.” Masi mawoko awe yaari ooloka. Makhalelo awe yaari ooloka, ottuli waya.

⁸⁹ Tivo, okhala wira paahi ninniweriya okhala oowuukhuwa, khenihimya wira nihoopowa. Okhala wira ninnirowa okereja, khenihimya wira nihoopowa. Muhaamini iroho iyo soowoototha. Eroho y’ekeekhai ya Muluku, Masu eekeekhai a Muluku, ti Ekeekhai ya Muluku; ekhanle Epyo ya Muluku, enrowa omukumiherya Muluku mmakhaleloni mwanyu; okhala a nneema, ooreera murima, oowaarya.

⁹⁰ Eriyari y’atthu anci-ene ninniphwanya vatthu wuukhuwa, ni sikina, vale sikhhanle ifithina ni wootheryana, ni itthu sothene sootakhala. Munna, owo aasitu sulfuuriku mukereja. Iwo owerya wa xetwani. Iroho s’alopwana n’athiyana ankela eriyari mmosa ni mukhw’awe, ni weererya ovira, wira, “*Ela* khereenre, ni *ela* khereenre, ni *ele* khereenre.” Mwattharathara vale, imaara thanu na xexe muhina mwa muloko ti mutthu ene yoowo onkumiha manyakunyaku, ohikhanle saana. Amen. Muluku omunanara ohiiwanana eriyari y’axinna. Mukhale oottitimiha, mukhale ooreera murima, mumphenteke Muluku, mukhale ni Yoowo. Nto mwaasuwelakaru wira makhalelo anyu annilikana ni Bibilia, ni oloka wa murima, oloka wa soowuupuwela, omphenta munn’inyu, mutthunaka wira ele eri yooreera wira mweettiherye Omwene wa Muluku, ni mwiiraka itthu iyo, muwaraka vantthuney’aya, mukhalaka vantthuney’aya, mulavulaka vantthuney’aya, murowaka mapuro antthuneya, vano mukhalaneke wuukhuwa wotheene muntthun’anyu, nto atthu othene animwaamini yeeyo.

⁹¹ Yesu ohimnye wira, “Nyuwo mwa maakha a mulaponi. Maakha yahiya osiva waya, kharina-tho muteko, oriheliwa ota khiyanakeliwa n’atthu.” Nyuwo mwakhala maakha paahi, khamurina muteko. Masi mwakhalana esivelo mwa yaawo, mukhale oolukiwa vano olumwenku onoovoliwa ntthona. Mukhale oolukiwa, awo anoovoliwa ntthona. Oh, wulu!

⁹² Iroho soowoototha sirowaka, axetwani oowooothererya. Nkawehani, hiyo nri nihiku nookiserya. Hiyo nri okathi wookiserya. Olumwenku ohanle vakhani ophiya v’ethokani vaya, ntoko namacici oowiipa ori nipuro nlo onrowa ophutuwa nihiku nlo nto muropwe onrowa otuphela ota waya. Ti wootakhala. Khuuvo murette onwerya ovoniha. Awo aamukhootta soo—sooru. Awo aakhootta olooliwa. Mmukuxe namacici oniipa vo, nto mwaahinwurye penisiliina wala etthu siiso wira mmukumihe-vo, wala etthu ekina, owo onootthikela annuwaka mpakha ophutuwa.

⁹³ Ti yeeyo olumwenku oniir’aya. Oroopacerya, woohikhala khalayi, omoramora. Arookhuma n’ankhili aalupale, iroho soowoottha khukela khupacerya waaleela atthu *ela*, *ele*, wala *ekina*. Hiyo niroomwaramwareya miromolelo imiya thanu

na xexe n'itthu soohiyana-hiyana, khula mmosa ni moonelo woovirikana. Aniira, "Hiyo ninaamini *ila*, vaamala! Ti yeeyo tu enaamini ahu." Awo khanwerya ohiya Eroho Yowarya okela. Awo khanwerya okhalana ethanelo y'ovira. Muluku aarina nikhuru n'atthu naawerya okhuwela, vano atthu othene yaahaana okhuwela. Khukhalana amosa-amosa yaawerya olavula ilavulelo, vano atthu othene yaahaana olavula ilavulelo. Othene khukhala sa, mpakha okhala (exeeni?) yoopahuwa voomalela n'irooho soowooto, atthu oowooto wira ekhaliheke wuukhuwa nno ohikhanle hata Muluku mwa yothene eyo. Vano anookhuma n'ukhalana khula enamuna ya makhalelo awo antthun'aya weetela, vano nto ni wiihana yeeyo "muKristu."

⁹⁴ Vano olumwenku onookhala owehaka, ni wira, "Ahe, nkawehani vale! Miyo ka mutthu ooloka ntoko awo."

⁹⁵ Ntoko sihimaly'aka ohiyu umosa mwaha w'ekuluwe, mwaha wa natampi. Khamukhanle omulamula... Natampi natampii. Muheereryeke omurehererya. Muheereryeke omuleela *ela, ele*, wala *ekina*. Owo natampii, opacerya wene. Owo ekuluwee, opacerya wene. Owo khonsuwela etthu yoovirikana. Owo aarowaka osineemani, n'urowa Timinku, n'urowa inamuna sothene sa mphira a poola, ni wira itthu iya sothene, owo natampii, opacerya wene. Mukhalelo awe ori ntoko ekuluwe. Ekuluwe eyo enookeliha munyuttu aya vanikutthani na eturumu n'ukhuura inuku sothene vaavo, n'itthu sothene; ahe, owo, owo ekuluwee. Khompwapweleya. Owo ekuluwee. Ti siiso siry'aya n'anatampi. Masi mwaarowaka ni wiisihana muKristu, n'ukeliha ephula anyu ni yoowo, vano khamulonke onvikana owo, masi, nyuwo mootepa. Mukhume varyari v'etthu iyo. Muhiye s'olumwenku. Muhiye. Mmuhiye Muluku avare muteko. Muhiye.

⁹⁶ Enihiyeya sayi? Atthu anci-enexa antthuna osuwela olelo, aniira, "Ahe, Munna Branham, enihiyeya sayi?" Koosuwela wira moomwiiwa teyoloxiia munci-ene a yeeyo, "muhiye." Atthu anci-ene anooviheriwa, etthunaka ohiya. Atthu anci-ene animoorwa ni wira, "Kinrowa otthuka mahiku miloko mixexe wira kiire etthu." Khivantthuneya otthuka mahiku miloko mixexe. Vantthuneya ohiya sa molumwenkuni n'itthu iya sothene s'exetwani, khukuxa Masu a Muluku mmurimani mw'anyu. Muhaana oxuttihiwa moota wo wira yeeyo. Kheniiriwa eyo mwaha w'otupha nno ni nno, nnakhala kheniiriwa n'utthuka wa mahiku miloko mixexe. Eniiriwa ni murima wo wiivahererya wa Muluku Oowerya sothene.

⁹⁷ Ntoko mwanamwane mwaamukhaani. Koomuweha mwan'aka ottuli iwe, ame awe etthunaka omuwariha ekhasako awe yaamukhaani, voosiis'ula. Owo aatthuna ohela moonoo awe mukhaani mmoononi. Owo khaawerya ohela moonoo awe mme; khonsuwela moota xeeni. Muhaana weettiherya moonoo

awe mukhaani. Owo ontthuna okeliha moonoo awe mme, masi onoovonya nipuro nene. Owo khoniphiya vagoononi va khasako. Onnisuwela wira khori vagoononi.

⁹⁸ Nave-tho nyuwo munnisuwela wira khamukhanle saana ni Muluku, nlelo mwawootheryaka atthu, mootakararu, mwiiraka itthu sothene. Khamukhanle okhala saana ni Muluku, nkincala ikereja kavi muniir'anyu mpantta, mpakha munep'anyu okhale woorukunxiwa. Munna, eyo ti ya khalayi, masi eyo enookaphula n'ulyiha munep'anyu. Khweeli!

⁹⁹ Oneeserya okeliha moonoo awe, ohaana okhalana mutthu wira amweettiherye, moota w'okeliha moonoo awe. Vano akeliharu moonoo awe mukhasakoni mwawe yaamukhaani, onosuwela wira ookhala saana.

¹⁰⁰ Ti siiso ery'aya ni khula muKristu oyariwe vasya. Owo akelaru mwa Muluku vekeekhai, onooweha makhalelo awe ni Masu a Muluku ni osuwela wira ori oolikana ni khula etthu a Yaawo. Owo ookhalana ovilela, oreera murima, mmaaleleyo, wiimaaliha, owerya, waamini, ophenta, ohakalala, murettele. Owo khankakheliwa nno ni nno ntoko ephareya etannyeye. Owo khonvelavela mwaha w'etthu ekhaani. Owo khontupha *nno* ni *iwe*, ntoko erooya y'esupha mphareya mw'ettheke. Owo t'olipa. Murim'awe ti wooloka. Soowuupuwela sawe ti sooloka. Soothuna sawe ti sooloka. Ethanlelo awe ti yooreera. Ni onnisuwela wira ori oolikana ni Masu a Muluku. Omooroni wothene khonwerya omuttikinya. Owo ori oolikana ni Masu a Muluku. Ookhalana ophenta wa Muluku, oloka mmurimani mw'awe, wa khula mulopwana ni muthiyana. Owo ookhalana...Owo onniisyakiha itthu sa molumwenkuni, iyo sihookhwa wa yoowo; khontthuna-tho. Vano, khivaakhanle oweryaneyaka omwiiriha mwaaruusi orina Eroho Yowaya owara ikuwo iye soowooneya ohifayi ni okhumela iwo vahiitthu. Nnari, mulopwana.

¹⁰¹ Vano, khivanthuneya orowa omuleela wira oovonya, 'okhala wira khonrowa owaaminini, okhala wira ti yeeyo tu ensuwel'awe. Iwo opuha wawe. Muthiyana onwara itthu iyo sikaani; wira ekhume, makaaripi, okathi alopwana anrw'aya owaani; awo anoorwa othikila malaxi vapuwani, ntoko... N'ukileela wira eyo ti yooreera? Muthiyana, nkinihimya wira nyuwo moo—mootakhala. Nkinihimya wira nyuwo mwa oohifayi. Masi khamunsuwela, munna, wira erooho yootakhala ehoovarani. Mwaarowa wiirela exeeni siiso? Mookhalana ankhili oophiyerya wira musuwele wira khivanriiryaxa. Ti voovihaxa. Yookhala erooho yootakhala.

¹⁰² Nyuwo muniira, "Miyo? Miyo, kaahirowa okereja!" Napukutunosoori aari mutthu muulupale. Masi, mwaha w'okhala owiisoonu, Muluku aahinvaha erooho y'enyompe yoolopwana, khimuhiya okhuura malaxi iyaakha thanu na

piili, nto makwarikhw'awe khunnuwa ntoko amosa-amosa w'athiyana aniir'aya nno. Ti yeeyo. Vano owo aaroovariwa xetwani.

¹⁰³ Mulopwana mmosa aaroovariwa xetwani khurula ikuwo sawe. Khivaaweryaneya owarihiwa ikuwo. Munnoona enihimy'aka? Iyo irooho sowootooha.

¹⁰⁴ Ekerej'anyu ennivilela eyo. Mulaleyi anyu onnoova ohimya etthu, onoova wira khamunrowa-tho oliva sanamuloko sanyu. Mwaha wa yeeyo. Owo ti mulattu ene. Wulu, Muluku aka! Onroiwa sayi waalaleerya amarepo, 'ehikhanle wira anoorukunxa murima n'ukhala saana ni Muluku, opacerya wene? Anookwanyiha ephula aya mwa itthu s'okhwa okathi wothene. Entthuneya oyeehi, ni muhakalaliho wa enamuna ya khalayi omphiya okhuma olimani mpakha olimani, ni waakhaliha alopwana n'athiyana saana ni Muluku. Muhiye, itthu sa molumwenkuni! Muhiye, elaleeryo eyo yookenkeneya. Amen. Mulaleye Ehapari yooreera. Muluku ohimnye siiso. "Mwaaphentaka olumwenku, wala itthu sa molumwenkuni, ophenta wa Muluku hata khokhanle mwa nyuwo."

¹⁰⁵ Atthu anniwerya otupha nno ni nno, n'unyakula ohiyu wothene, n'ulavula ilavulelo ntoko wira anitthela epwiri vasapalani yoowuuma y'enyompe; anookhuma, voosiisu aya, ni mukhalelo woophiyerya waakhulana ni saroti oovilikeya, okhuma naanaanoru ohimya etthu mukereja enrowa okawanyiha ekereja yothene. Vekeekhayi kehiyo hat'ettu woohikhala irooho, soowootooha sa xetwani! Mutthune otthikela Masu, memmo Muluku ory'awe oloka, oowaarya. Amen. Eyo Ekeekhaii. Irooho soowootooha sinvirikanya Masu a Muluku!

¹⁰⁶ Aahikhala mulopwana mmosa, kahi khalayi, aarina mwaamuthiyana mmosa. . . aKatolika aakhalana etuusiya ntero iwe. Okathi awe w'ohiya woona mweeri, enkhuma mmatatani mw'awe ni vayuuci vawe. Vakhala wira mulaleyi ooloka orina Eroho Yowarya. . . Miyo kuupuwela. Mulopwan'owo aahikhalana murinki w'etthu iyo, yaakhumme mmatatani mw'awe, arowaka iwo waattikitthela atthu ni yeeyo. Whish! Ikharari! Ti yoomuvirikanya Kristu! Nkincala sinto ephome enkhuma vaphulani vawe wala vamuru vawe, wala vayi, munna, khiivo ephome enrowa orantela opuro wa Yesu Kristu Mwaana a Muluku. Eyo ti Ephome emosa paahi ensuwel'aka etthu. Owo khino aahikhalana makhura yaakhuma ntata nawe nimos, ni eviinyu khikhuma mwa nikina, masi, mwarumeelaru yeeyo wa khula enamuna y'etiini, ti xetwani. Owoona moota alaleyi anrow'aya wiihiya wootoohiwa n'itthu ntoko yeeyo!

¹⁰⁷ Etthu entthun'ahu, otthikela Eliivuru Muhoodi, otthikela Masu a Muluku! Ala ti Masu a Muluku, Bibilia a khalayi ni ooreerhiwa. Aniira, "Ahe, kinnoova okhala yeeyo, Munna

Branham. Kinnoova opwetexa vakhani opuha waka.” Mulattu ene xeeni? Khamunsuwela ele ekhanle opuha.

¹⁰⁸ Miyo koohimya wira nkimmulamula namuhapaliwa mwaha w’okhuma n’uhapaliwa. Owo othene t’oximwa. Owo khonsuwela. Owo onoovenya, voosiisu, owo t’osikula, oximwa. Onookhuma khiwurya isuupha piili wala tthaaru sa saravexa, n’urowa n’umuwurya wiskhi, ni inamuna sothene iyo sa itthu.

Nammunuula sikaro onookilaathi ni omulya, n’ukumiha mphulani mwawe ntoko ekamiyawu empakhira. Ti yeeyo tu. Miyo nkinimuulumela; iwo ti opuha wothene onsuwel’awe. Ti yeeyo ensuwel’awe tu. Owo ekuluwee, mukhalelo ene.

¹⁰⁹ Wuuliha muru nyuwo munihimya wira mwa muKristu n’uroromela itthu iyo ntoko opuha, okathi Ehapari yooreera ya Eroho Yowarya ehikhanly’aya etthu woohikhala ephattuwelo yuulupale ya opuha. Ehapari yooreera ya Eroho Yowarya ti ehapaleeliwo yooreera wa khula mutthu orina osikula. Nyuwo mwawuryaru Ehapari yooreera ya Yesu Kristu, munookhala oosareya Eroho Yowarya, munoohapaliwa mpakha ohiya olumwenk’ula, amen, ohakalala ohintaphuleleya ni woosareya ovuwa. Yookhala etumereryo voohihyerereya. Ohapaliwa woohihyerereya, oohapaliwa othana n’uhiyu! Amen. Awo Masu a Muluku.

¹¹⁰ Ekereja enimoorwa, n’ukhalaha etthu ekina. Awo ahaana okhalana niira nikhaani weiwo awo anrow’aya opahari, wira yarukuneye. Muthukumano mukhaani wira ettikhe iturufu, wira epatthane. Eyo Ekeekhaii. Ankhalana wiina, imaara sikina, owanny’awe mutthu mmosa, imaara sikina vathi mukereja. Wiina, ekhalihaka, yeereryaka ophwanya etthu y’ohakalaliha. Mulattu ene xeeni? Nlo nikhuru nuulupale na ikuluwe, khula enamuna. Awo ikuluwee, opacerya wene. Yaaphiyenrye okumana ni Kristu, yaamukhalana opuha wunci-ene, itthu iyo saamukhala sookhwaxa ovikana ohiyu eriyari, w’awo. Ehapari yooreera, oohapaliwa mwa Eroho, ohakalala ohintaphuleleya ni woosareya ovuwa.

¹¹¹ Muhimulamule natampi; mummorele ikharari. Mmuhiye akelele ohoolo avureke mulape awe, mmuhiye anwuryeke aalikoro awe, mmuhiye akhalane maira awe a iturufu. Iwo ti opuha wawe. Muhimuulumele. Arwaaka owaani ni sothene, ookhulumuwa oolamwa, owo onthuna opuha. Etthu ya nyuwo wira okhalana makhalelo ooreera saana mukhanly’anyu omooniherya wira Ehapari yooreera yookhalana imaara ikonto sene ovikana yeeyo, wa owo. [Nipuro vahiiitthu mufiitani—Mol.] Nto owo akhwa vale ni mukhalelo yoowo, onoorowa omooroni, mwa aalikoro awe. Eyo ehapaleeliwo ya xetwani. Owo akhwa vale, anuulaka mulape owo, Muluku ti Mphuki awe. Owo akhwa vale, arowaka iwo, ainaka, ni eettasaka iwo n’ikuwo soohifayi, Muluku ti Mphuki aya.

112 Masi yookhala etthu emosa, mwakha vale vathi va Owerya wa mureeriho wa Eroho Yowarya, ntoko Sitefano saakhwiya'awe okathi waawehaly'awe osulu wiitho wa Muluku, khwira, "Kinoona Erimu etthukunwe-ene, nto Yesu eemenle-ene moonoo woolopwana," nyuwo munrowa Wirimu, ntoko makhare arowaka mpuruni mwawe. Amen.

113 Irooho soowoototha sinvirikanya Masu a Muluku! Muhiye, mutthukule ntata. "Eniriwa sayi, Munna Branham?" Mutthukule ntata paahi. Ti yeeyo murin'anyu wira tu. Mukuxe Masu a Muluku. Muheererye okhanyereriha hat'etthu. Muhirowe mpakha waltaari n'umana vaavo, mukhuwelaka, "Muluku, mukivahe Eroho Yowarya! Pwiya, mukivahe Eroho Yowarya!" Eyo khenrwa, mmanaka waltaari vo. Eyo kheniphwanyiha etthu. Nnari. Kahi ti enamuna Eyo enrwa'aya. Enkhala, omutthara Owo mwa Masu Awe!

114 Nkanweheni Petru. Petru aari mooxankani, yaakhala ntoko aarowa okhwa. Vano owo khuwoona Apwiya erwaaka, yeettaka vasulu va maasi. Nto owo khwira, "Pwiya, mwaari Nyuwo, mukirume kirwe."

Apwiya khwira, "Rwaakani."

115 Vano Petru aahiira, "Vano nwehererye minuutu mmosa, Pwiya, mukihye kitthukwe mahiku miloko mixexe, koone sinto kinoowerya weetta vasulu va maasi, wala nnari. O Pwiya, mukihye kaakhele Eroho eniphiyerya mwa miyo, wira kiwerye wiina mwa Eroho ni olavula ilavulelo, mukalawani mu, vano kinoowerya okhuma-mo"? Nnari, mulopwana! Owo aamukunxe Muluku mwa Masu Awe, khuhiya ni khutthukula ntata. Muluku khimuweriha.

116 Ankhi Muluku aakumanneru ni Moise, nto Owo khwira, "Moise, murowe wEjitu, mwamulelele Farawo, 'Aahiye atthu Aka arowe'?" Ankhi Moise iirale, "Mukihye kitthukwe mahiku miloko mixexe, toko, koone sinto kookhalana waamini oniphiyerya wira kiwiweleleni Nyuwo, Muluku. Mukivahe etthu, etthu ekina, Pwiya. Mukihye kooleleni etthu emosa, mukihye koone sinto kinookela mwa Eroho, toko"? Moise khaakonhe hat'etthu, owo aamukunxe Muluku va Masu Awe paahi, khurowa. Ti siiso murin'anyu wira, omukuxa Muluku va Masu Awe. Nto munoosuwela wira munoowerya wira. Owo khaalipelenle mpakha etthu ekina wiiraneya, owo aarookelela ohoolo paahi khwiira.

117 Ankhi Eliya, okathi waakhurun'awe oMwaako Karmelo, okhanle-ene weiwe okathi munci-ene? Vano owo khumphwanya naamukhweli mmosa oohaawa. Owo aari e...Owo aari ookhopela, Mmalapo. Nto okathi omuphwany'awe iwe, owo aattottela ithaatu, okhwipi. Nto Muluku khimuleela, "Mukhuruwele mpakha owanny'awe naamukhweli ule." Nipuro xeeni na mulaleyi orowa!

118 Va owo onrowa iwe mpakha owannyawe naamukhweli. Nto vairaly'awe, owo aarina ithaatu piili. Khwira, "Muniira exeeni?"

119 Khwira, "Kinttotta ithaatu kamosa-kamosa. Kirina paahi otthu oniphiyerya opaka mikatthe miili sa nakhuwo. Ti yoowo tu kirin'aka ohanle. Soovira iyaakha tthaaru okhuma okathi naarin'ahu epula." Nto khwira, "Vano kinrowa opaka mikatthe iya sa nakhuwo. Nto miyo ni mwan'aka ninrowa okhuura, nikhweeke."

120 Owo khwira, "Mukipakele mmosa, toko!" Aleluya! Oh, koosuwela wira koovahuwa vakhaani, masi kiri mpantte w'Apwiya, nnakhala vo. Khwira, "Mukipakele mmosa, toko. Maana, SIISO ANIHIMYA T'APWIYA." Eyo vo.

121 Exeeni iyo? "Mphaveleke toko Omwene wa Muluku, ni exariya Awe." Kahi Omwene wa Muluku ni "onyakula vakhaani," kahi Omwene wa Muluku ni "wuukhuwa vakhaani," kahi Omwene wa Muluku ni "ela vakhaani wala *ele*." Masi, "Muluku, n'ixariya Awe, nto itthu iya sikina sothene munimuncereriwa." Muheleke toko!

122 Vano, naamukhweli ule aahiiwelela yeeyo. "Waamini onrwa mwaha wo wiiwa, wiiwa Masu." Owo khwira, "Awo Masu a Apwiya, maana ole mutthu oowaarya a Muluku. Ole profeta a Muluku, ni koosuwela wira ekeekhai. Ni awo Masu a Muluku."

123 Vano, owo khaatthimakale arowaka waakoha anamaitthoko awe moota wo wira. Owo khaatthuna orowa okawanya yawawe. . . waaleela anamaitthoko, wira, "Vano, munoona sayi? Mulaleyi ori owanny'aka, ahimyaka *ela*. Susie, munoona sayi *yeela*?"

124 Owo aaroovolowa, khupacerya oyeehi. Owo aatthukunle ntata. Owo aatthukunle ntata na etthu aarin'awe, wira akhalane-tho. Ti yeeyo olumwenku onthun'aya olelo, olewa wa enamuna ya khalayi ele murin'anyu. Aleluya! Owo aarooyeehi, wira awerye osareya. Owo aarooyeehi makhura othene aarin'awe, ni makhura othene aarin'awe ni otthu wothene aarin'awe, wa mulaleyi, wa Omwene wa Muluku. Nto okathi oyeehenry'awe sothene mme, Muluku aahikhuruwa, khusariha mwaapu w'otthu, khusariha murinki wa makhura. Owo khuyeeherya-tho, mmuhasani wa mulaleyi. Nto Eyo khuvira, khusariha-tho. Owo khuyeeherya-mo. Khula okathi aayeeh'awe, Owo aamusariha.

125 Miyo kinoohimya, olelo, mutthu ayeehi-ru ethiru ila yothene ya itthu s'elolo, ni s'otakiherya oKristu, khuhiya Eroho Yowarya okhala opuro Aya, onookhala muhakalaliho onrowa opacerya Ephiro ya Neethanu neeraru ni Penn onrowa omwaramwareya elapo yothene. Muhiye ethiru iyo. Mutthikele Masu a Muluku. Muyeeyi, wira mwiisarihe. Muhiye erowe, nto Muluku onoohiya orwa. Muyeeyi, Muluku onoosariha. Itthu sothene s'ohina

muteko, so wira, “Muhaana wira *ela*, ni muhaana wira *ele*; ni mwaahaana wira *ela* ni mwaahaana wira *ele*.” Muliya! Muyeherye ota wa munep’anyu!

¹²⁶ Mwiire, “Muluku, mukihye, okhuma mootheene *ela*... nihiku nla, kikhale othene Awinyu. Pwiya, kinoorwa ni murima wo wiiniwa. Kinoorwa n’irooho yo wiiniwa. Miyo kinnoophentani. Nyuwo moosuwela wira kinnoophentani. Ni kintthuna kiliyale ololo ola wothene wa otthuka nno wa mahiku miloko mixexe koone sinto kinoowerya ophiya vakhiviruxa wa Muluku, ni yothene *ela, ele, ekina*, ethiru ila yothene.”

¹²⁷ Muhiye! Khiivo ethu muhina mwa Masu enoohimeeryani wira muhaana otthuka mahiku miloko mixexe. Hat’ethu. Khiivo ethu ene hata enooleelani wira muhaana otthuka, ’vahikhanle wira Muluku aamooleelani. Mwatthuka vale, khamunrowa ovoliwa etala, n’ukhalana itthu sothene iya. Muryeene ootthuka, munna, munookhala ootteeleliwa murima ni ootthapa okathi wothene. Oohimya, “Muhiisooniheryeke w’atthu ntoko anii’aya alipa-oowoka, ni wiitho woovolola, woosanka. Kiri mootthukwani wa mahiku miloko mixexe. Maino aka kharowa-tho okilikana. Koovukuwa ikhiilu muloko ni tthaaru, ni kileeliwe wira kinookhala saana nuumala yeela.” Oh, ethiru! Iyo irooho soowoototha sa xetwani.

¹²⁸ Anoophiya waltaari, ni wira “ovuwa, ovuwa, ovuwa” mpakha ohiwerya ohimya ethu ekina, ni aniira, “Muhaana olavula ilavulelo muhinatthi waakhela Eroho Yowarya.” Ethiru! Muyehehi!

¹²⁹ Mukumihe eyo mmweettiheryoni mwanyu nto murwe muttharihaka Masu a Muluku! Owo ohimye wira, “Murukunuxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi sanyu, munimwaakhela yoovaha ya Eroho Yowarya.” Muluku aahimaliherye Masu Awe, Owo kahi Muluku. Amen. Muyehehi. Musarihiwe. Amen. Whish! Okisivela yeeyo. Awo Masu Awe. Muluku ohimye siiso. Eyo Ekeekhaii. Nto okathi Muluku ohimye’awe, Muluku onookhapelela. Vaareera. Itthokiheryo sothene mumpak’anyu, weetta okereja wothene muniir’anyu. . .

¹³⁰ Vekeekhai eri ntoko okaafirika wa ivakawu nno weiwo sinipakiw’aya nikuttha nuulupale s’opakhirela, wala, nikuttha nuulupale sa ivakawu s’anaikwaha. Kaanivaraka muteko weiwo. Nto sinookuxiwa n’upakiwa ivakawu iye suulupale ni sothene, n’uheliwa matoro oolipa, mokino ooheliwa-mo ipantte sothene, ni itthu sothene vooreera saana, saaheliwaka ota iwe mumphitoni, ni yaari yookhwa ntoko epreku vamukhora. Vale maakina yaaphwanyaneya yeemenle, ehirina mukupetthe. Awo yaakhala vale paahi.

¹³¹ Ethu awo antthun’aya olelo mooro mmunoni. Ethu entthun’aya olelo mukupetthe. Ethu entthun’aya olelo, ekereja,

wira ekaphuleke; etthu yookaphulaxa ekhanle wira ekaphulihe etampi okhuma mmakhaleloni mwanyu, ophentaa. Ni nyuwo mwaahiweryeke ophentana mmosa ni mukhw'awe, munrowa omphenta sayi Muluku Yoowo muhimoonyanyu? Ophentana onnikhuneela itampi sinci-ene. Mukhale oosiveliwa ni Muluku, vano munoophentana mmosa ni mukhw'awe, vano munoophenta ekereja, munoophenta Niwoko nene, munoophenta sothene siri sooreera, ni munookhala ottaiwene wa itthu sa molumwenkuni.

¹³² Irooho soowoototha sinkhumela iwo ni waaleela atthu *ela, ele*, wala *ekina*, “Awo ahaana wira *ela*. Awo ahaana wira *ele*.” Okhala wira miromolelo sirookhumelela, khukhalana muupululo mmosa mukhaani awo aniir'aya, “Ahe, vano, kinnaamini wira mutthu... Kinnaamini etthu ene eyo ntoko okhuwela mBibiliani.” Ti yeeyo. Eyo Ekeekhahi. Awo apanke muromolelo mwa yeeyo, “Mwaakhuwelaka vale, muhaakhela.” Masi khimwaakhenle.

¹³³ Ole woottharelana khukhumelela, khwira, “Olavula ilavulelo.” Eyo Ekeekhahi. Eyo eri mBibiliani. “Ahe, mwaalavulaka ilavulelo, muhaakhela.” Masi anci-ene aya yaahilavula ilavulelo nave khayaarina. Munnona? Kahi Yeeyo. Nnari, mulopwana.

Anci-ene aya yaahimya wira, “Ahe, nihaana olaleerya.”

¹³⁴ Nkaaweheni maprofeta ala va ni manyaka vamuru vaya, etuphasaka nno ni nno elaleeryaka. Mikaya khwira, “Nyuwu, khula mmosa, munimootha.” Amen. Khweeli. Muluku khanrwa siiso. Muluku onrwa wa murima wa xariya onoorwa n'irooho y'oxanka, yoolola. “Ole onrowa, waala anlaka, vekeekhahi onrowa ohokolowa otthapaka, aruhaka mavisii ooreerexa.” Amen. Mwiiwe oratteene yeeyo, mpatthani.

¹³⁵ Oxutta wunci-ene s'axetwani, axetwani anvara muteko mminepani mw'atthu! Nwehe vatthu vaniim'aya muhokorokho aya. Nwehe enamuna xeeni ya makhalelo mutth'uwo orin'awe. Moone moota aniir'aya, nwehe moota aniir'aya, moone ale akhanle mawoko aya. Ti yoohiweryaneya tu... Ni miyo koolenleni wira, “Enamuna emosa paahi... Va simphanyaneya ikaaro, sothene sithatanne va. Erimu eri oCharlestown. Khamukhanle orowa mweettaka. Enamuna emosa mukhanly'anyu orowa, ekaroo. Ni khula mutthu onlapuwa mukaano ohaana oruha ikalawu thanu sa kasoliina.” Va eri ekaro awe, masi aahikhalane kasoliina khokhanle weettiha. Ahe, eyo ti yoolikana, enamuna yoolikana siry'aya Wirimu. Mwakhwa vale muhirina Muluku, nkincala moota xeeni mwaakhal'anyu ni ikaaro kavi mupank'anyu, ophenta wa Muluku waahikhale mmo wira woopuruleleni mOmweneni mwa Muluku, moopweteya.

¹³⁶ Yookhala nekatiiwu ni positiivu. Khencala positiivu xeeni ekwirenti envir'aya va, yaahikhalane-ru efiyu ya

vathi, khenrowa opatta. Eyo Ekeekhaii. Muhaana okhalana mitathaari, ookhaliheya m'ophentani mwa Muluku. Oh, munna! Muruuhe nekatiivu ni positiivu vamosa, munookhalana Muthuko, Muthuko wooreera ni wa enamuna ya khalayi ya Ehapari yooreera. Muhiye omwareele okhuma olimani mpakha olimani. Khamunrowa okhalana Owo muhirina yeeyo. Voohicala moota xeeni mukhanly'anyu othukumelaka ni otupha n'ile positiivu, muhaana okhalana efiiyu ya vathi wira mumpattihe luuxu. Amen.

¹³⁷ Mootoko oweha? Mwahelaru efiiyu ya vathi va, n'utthikela yothene wenno osupistasawu, erowaka olukama vathi. Nto khula okathi mutthu onkhal'awe a mitathaari ni olipa mwa Masu a Muluku, eyo enoomukhaliha mitathaari ni omulipiha oKalvario, ottaiwene, weiwo nankura, nivattha na muxereryo wa Muluku oroihiw'aya-wo, wira opattihe Muthuko wa Ehapari yooreera. Amen.

¹³⁸ Moosuwela mulattu ene t'uvi? Atthu mamp'ala aalipa-ookhwa maalupale ni ooriirya nno, anooneya ntoko olaleerya Ehapari yooreera. Mulelyi mmosa mwaamukhaani aahikirweela nsana, oniira mpantha wa mmosa wa miromolelo suulupale sikhanelle mulaponi olelo, ohiya eKatolika. Owo khwira, "Munna Branham, koolamwa ni kihooceya." Khwira, "Ninrowa wiirihwa hiyo alaleyi othene owara malaya n'ukhuna mikala sahu, ni—ni olaleya itthu kamosa-kamosa. Ni ninrowa oleeliwaka etthu yoolaleya, khula miyeeri miraru." Owo khwira, "Nkikhanelle ovilelaka-tho yeeyo." Owo khwira, "Kiireeke exeeni? Kipacerye olaleya Ehapari yooreera?"

¹³⁹ Miyo khwira, "Munna, mwaakhalakaru ni muromolelo yoowo, muttittimihe. Muhimyeke paahi ele anihimya'aya. Masi mumphavele humu anyu wala mahooleela anyu a estaatu, mwiire, 'Mwenye, kooyariwa vasya ni Eroho ya Muluku. Ala va Masu a Muluku. Mwakihiyaru olaleya Yaawo, kinookhala mukereja mwanu. Mwaahikihiye, kinoorowa. Mmunnyeke mutthu mukina.'" Eyo ti enamuna yo wira. Muhiviravire. Muhikhale ookhotta. Murowe mwahimye ele ekhanle. Khweeli.

¹⁴⁰ Owo khwira, "Munna Branham, munoona wira kaamukhalana muthukumano?"

¹⁴¹ Miyo khwira, "Vari Murutthu, t'anthukuman'aya Axawawe." Ti yeeyo, awo anoothara.

¹⁴² Ntoko mulopwana, emaara emosa, aahuwa alyakhu. Vano, kehiyo eperwa. Nkinihimya ela ntoko eperwa. Kinihimerya niwoko nimosa. Owo aarowa waahela alyakhu awe wira yuuramele, nave khaarina mooce yaaphiyerya. Owo khumpweherya nooce na nrattha vathi va mmosa. Nto okathi othene atotholans'aya, nrattha naari etthu yootheihaxa alyakhu yaatonko aya wona. Vano mwalyakhu aamwaarettihela alyakhu axikhaani vano alyakhu axikhaani yaamurwa, masi

nrattha khinaasuwela nntaava nlo. Masi, nihiku nimoso, mwalyakhu muulupale khwaaroiha wiithela wa muruttu. Waahikhala muratthi wiithela wa muruttu. Okathi nrattha nle naamukhaani noonaly'aya wunkhela maasi ale, nlo khurowa nitthyawelaka mmaasini voowaakuvexa ntoko naawery'aya. Mwalyakhu muulupale khwira, "koo, koo, koo." Vano nrattha naamukhaani khwira, "kwa, kwa, kwa." Nlo naarowa mmaasini. Mwaha wa xeeni? Nlo naari nrattha, mukhalelo aya. Okathi noonaly'aya wunkhela maasi, munna, kinaawenrye okhala ottaiwene, maana naari nrattha.

¹⁴³ Nto miyo kinihimya olelo, khula mutthu onttuna vekeekhai omphwanya Muluku, khonrowa ohiyererya ekereja omukhanyererya itthu ohinwery'awe otthara, *ele* wala *ekina*. Mwakhala mukhalelo wa Muluku mwa nyuwo, munoorowela ereerelo murima. Munoorowela etthu yooloka. Munimweemererya etthu yooloka. Munimwiira etthu yooloka. Munimuupuwela etthu yooloka. Munookhala etthu yooloka. Mwakhala nrattha, anoosivelani maasi. Mwakhala muKristu, noosivelani Kristu. Mwakhala xetwani, sinoosivelani itthu sa xetwani. Mwakhala nrepo, munoolya itthu sookhwa. Mwakhala ekuluwe, munoolya etrumu. Nyuwo muri vayi olelo? Khweeli. Nyuwo munihihimya okhala osulu nno, mulyaaka itthu s'Apwiya, vano n'ukhuruwela n'utholathola ni xetwani. Yookhala etthu ehilonke ni yeeyo. Muhiye wiiwelela iroho iyo; awo t'axetwani. Hata vakhala wira muhaana okhala meekh'inyu. Alopwana n'athiyana atonko ohiyererya etthu, anci-ene aya, ankhala alopwana n'athiyana yaahanle meekh'aya ni Muluku.

¹⁴⁴ Nkanweheni Mikaya, mooto owo aary'awe wu; kahi ntoko mwala w'oXipralatari, masi Mwala w'Okathi. Owo iirale, "Nkinrowa olavula hat'etthu. . . Nkincala etthu eseminaariyu enihimiy'aya. Nkincala etthu muthukumano aka onihimiy'aya. Nkincala etthu mwene enihimiy'awe. Awo yakihita muru aka, miyo kinrowa paahi ohimya etthu Muluku onihel'awe mwaano mwaka wira kihimye." Owo aahikhalana exariya. Owo aahikhalana exariya.

¹⁴⁵ Nto olelo, alopwana n'athiyana, muhiwelele ele olumwenku orin'aya wa nyuwo, ecalelo xeeni owo orin'aya, muthinto xeeni wa mwaapomphe oniwiiva axiitthu awo orin'aya, n'uhimya wira, "Mwaitakanxaru ni ekereja, munookhala saana." Owo mwaapomphe oowoothiwa. Mwaha wa xeeni? Nlelo mookhalana eretta ya etampi. Eyo ekeekhai. Masi kinooleelani etthu emosa, munna, enrowa woopophani mwaha w'etampi, ti, orwa w'Ephome yooreerexa ya Pwiya Yesu Kristu khusarihiwa ni Eroho Yowarya, nto eyo enimooopophani wiiva etampi yothene, ni sootthuna sanyu sinrowa okhala soowuuramela Wirimu, ni khamunrowa okhalana okathi wa itthu sa molumwenkuni.

Nrowe nivekele.

146 Tith'ihu a Wirimu, noonaka irooho iya soowoototha mw'atthuni, ni nisuwelaka wira awo anoothanya itthu sa Muluku, miyo kinnivekela, Muluku, wira Nyuwo mumphwanye khula mulopwana ni muthiyana mpaani mu olelo. Muhiye wira nla nikhale ti nihiku, Pwiya, awo anrow'aya osuwela wira makhalelo aya khanaakhulela Masu. Ni wira aniiwelelaka etthu yoonanara, xetwani onaamaalihan'aya ni irevista Ehantisi y'Ekeekhai, ithiru soowuntta sa molumwenkuni, ni wooniheriwa wa ifilime ni televisawu yoonanara. O Muluku, itthu soohiweryaneya muKristu oweha! Muluku, sinnineettiha murima. Nyuwo muhimmye wira siniweettihani murima, ntoko marapheyo. Nyuwo muhimmye wira, "Mwalapwa onththikela vamarapheyoni vawe, ni e—ni ekuluwe entthikela vamaroveni vaya." Mwalapwa a khalayi onoorapheya etthu. Omoona mutthu ooyariwa nuusu, onaanyiheriwa okhala, namirima miili orwa waltaari, ni ntoko wira onrowa orapheya olumwenku; nlelo onoothikela etthu emosaru, onoothika n'ulya etthu ene yeeyo tho. O Muluku, murapihe Empa Anyu, Pwiya. Aleluya! Nveleelihe Eroho Yowarya ni mukupalelo mmosa wa enamuna ya khalayi onrowa okukuttha soowunlela sa mutthu ni orapiha munep'awe, ni omurapiha ni omukhaliha mutthu oneetta arowaka Wirimu. Munvahe. . . Mureherye emiravo awe ni natiri awe ntoko xawawe, wira owerye owela khuvikana itthu sa olumwenku ula, ni awele Wirimu wu weiwo owo onwery'awe wona mikattyamiho saattamaka voorakamela. Munivahe, Pwiya.

147 Nyuwo muhaalikanyiha maprofeta Anyu ni yaawo, axawawe, wira jaarina niitho na xawawe, yaamuwerya owela osulu ni wona itthu okathi munci-ene sihinatthi ophiya-wo. O Muluku, mureerihe ekerej'eka yaamukhaani. Mwaareerihe atthu ala anoorwa va. Mwaareerihe aletto mpaani olelo. Ni mwaahiye esuwele wira Mutthak'ola kholukamiheriwe mutthu mmosa meekh'awe, masi olukamiheriwe vanci-enexa, Pwiya, ale ootthunexa muhina; nisuwelaka wira nihiku nimosa nihaana okhala vamosa woolamulani wa Muluku, ni nisuwelaka wira ninoorowa waakhula mwaha w'osuwela Ekeekhai nave khuhinahimya Yeeyo. Tithi, kinvekela wira Eyo yaakheliwe wa khula murima. Mwa Nsina na Yesu.

148 Ni miru sahu suuramme-ene okathi vakhani, kaatthuna kisuwele sinto ookhala mutthu va voosiis'ula aarowa wira, "Munna Branham, kihooceya mwaha wa itthu iya sikhaani. Kookhalana itthu s'ethiru sinkithipelela okathi munci-ene. Miyo—miyo kweekwe kinlavula voohitthuneya. Miyo—miyo kiniira itthu sahaatthuneya wira, ni koosuwela. Khasihiyo soophwanela wa muKristu. Nkinthuna wira yeeyo; Muluku onnisuwela wira nkinthuna. Ni nkinthuna wiiwelela-tho erooho ele ya khalayi. Ti etthu ene enikikhottihaka makhalelo aka othene, okhalana mphento w'ekeekhai ni otaphuwa mwa

Kristu. Kintthuna wira mukivekelele, Munna Branham, wira eki—ekikhume olelo.” Munnitthuna ovenxa ntata? Khula muru woowuurama. Muluku ooreeriheni. Oh, wulu, matata ituusiya sene! Itthu s’ethiru, itthu sikhaani siniwiirihani olavula wala opacerya enamuna emosa yaamukhaani ya mawoowo mukereja, eniwiirihani okela mpantte ni etthu ekina siiso. Oh, eyo ti yootakhala. Eyo onyakulihana eriyari y’axinna. Nto muhiireke yeeyo. Nyuwo khamunthuna eyo. Khamunthuna eyo n’itthu sikhaani sa khalayi, oviruwaso ni sothene sikina, wira sookhalihekeni vathi.

¹⁴⁹ Mwiire, “Muluku, nkinthuna-tho etthu iyo. Kihooceya mwaha wa yeeyo. Koolikana olelo wira kiimalamalihe yeeyo. Kinimoorwa vano, Pwiya, nto kintthuna kikhume mw’eralani mwaka yothene. Munn’aka aahikeettele oratteene, nnakhala vo miyo kinoomuvekelele. Atithi aka yaahikeettele oratteene, nnakhala vo kinimwaaphenta. Amwaar’aka yaahikeettele oratteene, wala aiy’aka, kinoorowa, voowiyeviha, ohoolo wa Muluku. Pwiya, kinweha paahi m’Omweneni mw’Anyu. Kintthuna wira muupuwelo aka okhale wooloka. Kintthuna wira murim’aka osareye otthapa. Kintthuna keette, mikattiyamiho sakhala sikirumelaka, nlelo kintthuna kikhale ni matat’aka osulu ni murima wooreera ohoolo Wanyu, Pwiya, kisuwelaka ela, wira nihiku nimosa kinoorowa okumana ni Nyuwo. Kintthuna enamuna yeeyo ya musuwelelo. Pwiya, mukikhalihe yeeyo, okhuma olelo.”

¹⁵⁰ Munnitthuna ovenxa ntata, mutthu ohivenxale ntata okathi ovinre. Muluku ooreeriheni. Muluku ooreeriheni. Munna, munoopele vakhaani ekaruma nirine-ene miru sahu soowuurama. Moota zeeni munihimy’anyu vekeekhai? Muhithweele vano. Ola kuhiyo okathi w’othweela. Ola okathi wo waakhela. Ola okathi murin’anyu waakhela Yeeyo. Murwe, muyeegi naanaano va. Munooyeehi? Murwe, munvahe sothene sirin’anyu Muluku. Mwiire, “Muluku, nkirina sinci-ene. Miyo ka mwaneene ethoko paahi muthiyana mwaamukhaani. Nkikhanle wiiraka vanci-ene, Pwiya, masi ki—kinniwerya omusoma Bibilia Anyu, kinniwerya olompa khula nihiku. Kinniwerya wiittha ikokhola sothene siri mmuruni mwaka. Kinniwerya wiittha etthu iyo yothene. Koottheka mwaha wa itthu sinci-ene mulaleyi ohimmy’awe voosiis’ula, tivo miyo—miyo kinooyeehi olelo. Nkinthuna. Muluku, mukisarihe mphento. Mukisarihe etthu enikiphentaha nwanani ootakhalexo orin’aka. Vekeekhai kintthuna yeeyo, Pwiya.”

¹⁵¹ Okathi onrumih’awe va, khamunthuna orwa vano weemela waltaari okathi vakhaani, nithukumanaka ni nuulumo na mavekelo. Mwaakuxeryaka ekeekhai yeeyo vano, vakhala wira moolikana wira muhiye, khamunrowa okhuma valtaari va olelo ni yeeyo vamurimani vanyu, mwarwaa-ru n’ixariya. Ni wira, “Kinoorwa nno wira kikhale, minuutu mmosa paahi,

Munna Branham, ayo, murine-ene nuulumo na mavekelo ni miyo, yoomi.” Ki—kinthuna murwe, nvekele. Munnitthuna orwa naanaano? Muuramme-ene miru sanyu, t’ani onrowa ovenya arwe waltaari, weemela waltaari?

Muhikihiye, O Moopoli ooreera murima,
Mwiiwe wunla waka wo wiiyeviha;
Mwaawiihanaka akina,
Oh, muhikihiye.

Moopoli, Moopoli,
Mwiiwe wunla waka wo wiiyeviha;
Mwaawiihanaka akina,
Oh, muhikihiye.

¹⁵² Hata wira ovinre okathi xeeni mury’ene muKristu, nave nlelo murine-ene irooho iye sikhaani sinlavula ni nyuwo, sinookhalihani oonyema, siniwiirihani omulavula mutthu. Mutthu aarwaaka khunapacerya omulavula mutthu mukina, nyuwo munimwiitakanxa ni yoowo naanaanoru, oh, omulavula mutthu ene yoowo tu. Ti yootakhala, munna. Muhiireke siiso. Eyo vookiserya enimookhalihani ota wa Muttethe wa natiri. Mwaakhalanakaru itthu sikhaani-sikhaani sa khalayi sahaathuneya okhalana, ophenta wa Muluku waahikhale mmurimani mwanyu vekeekhai, khamuntthuna okhala muhano wala mulopwana, onrwa khwira, “Muluku, vaava va kinrowa oyeeherya ota, vooviis’ula, vaava va. Kinrowa okhuma valtaari va kiry’ene mutthu oovirikana.” Munnitthuna orwa?

¹⁵³ Ookhala natampi iwo ohinatoko omukupali Yesu, ni moosuwela wira mwa natampi, muhimmsuwela Owo okhala Moopoli anyu? Nyuwo muniira, “Munna Branham, ayo, koona wira nkireerane opuha. Kinnirowa wiina ni maira ni itthu sothene iyo. Kinniwoona aprokrama oohiloka. Ni ki—kinnisoma mithinto sa iliivuru soohiloka. Kinnisoma iliivuru sirina ihantisi soohifayi memmo. Hata sinnikisivela osoma seiyo.” Munna, yookhala etthu ehilonke ni nyuwo. Iyo ti ikhwilyu sanyu; moone, mukihye koone etthu mutthu onsom’awe, mukihye koone etthu onoon’awe, wiiwa isipo siniw’awe.

¹⁵⁴ Nihiku nlo, kirwaaka mukaaroni, ookhala mutthu ookonle moonoo khimutthukula raatiyu aka, enamuna emosa ya isipo soohifayi. Miyo khwira, “Mutthuke etthu iyo. Nkinthuna wiiwa yeeyo.” Muthinto mmosa wa boogie-woggie.

Khwira, “Vano, miyo okisivela wiiwa yeeyo.”

Miyo khwira, “Mukhalelo anyu ti wootakhala. Nyuwo mootakhala.”

¹⁵⁵ Okathi waary’aka wenno, mahiku nuuvira eyo ehinatthi, mukhitte mme mwa mwaako ahiiso mukitthe mwa ntumuxa, kimiseryaka, ni mutthu yoowo. Axipalame ale axikhaani yaamwiipa. Akotoviya yaamutupurya. Amakhare yaamuvava musulu, ahiiso miryapwe, aipaka mittotopelo. Miyo

khimukhuwelela mmirav'ole, khwira, "Nkaweha, mmiravo, eyo t'esipo aka. Muhiye yeeyo yoothukuliwe-ene. Owo ti raatiyu aka. Muluku onaaruma awo okiipela miyo kakhala wenno. Ennisiveliha munep'aka."

¹⁵⁶ Yooreera ovikana etthu yothene ele y'elolo, ivitorola iya sinnyakula, sinruma, hata khivanweryaneya olya vapuwani voowaattiwa. Iwo olya wa xetwani. Eyo empa ya xetwani, sothene sootakanxeya ni etampi. Nyuwo murina malepa othene iwo ni enoosivelani yeeyo? Awo yaahelasaka musurukhu ule muvitorolani mme sikhaani, ni orumiha etthu iyo yothene yoonanara, nyuwo enoosivelani yeeyo? Wuuliha muru. Nyuwo mwa namahiya waamini. Muri oomurakamela Muluku. Khamummsuwela Muluku. Mwaamusuwela Muluku, mwa oleveliwa wa itampi sanyu, khamwaarowa-tho wiiwaka ethiru ntoko eyo. Yaamukhala yookhwa wa nyuwo. Mwaa—mwaamurapheya eyo. Khamuntthuna. Olya wanyu ti wooreera. Munnimphenta Muluku. Khamuntthuna orwa voosiis'ula, okokhora va n'ala anlapa voosiis'ula?

¹⁵⁷ Va ari alopwana n'athiyana akokhonre vaava va, akhanle aKristu iyaakha sinci-ene. Miyo nkinaakumiha okristu aya. Masi etthu entthun'aka wira waalela wira xetwani uwo, onaathara, onaakhaliha ota wa Opuha woomalela. Eroho Yowarya Opuhaa. Munna, miyo kinvenya oohapaliwa, kinrowa voolilini oohapaliwa, kinkhala oohapaliwa nihiku nothene, oohapaliwa ohiyu wothene. Oh, miyo paahi—okisivela paahi o...Kinrowa omiserya, miyo paahi, "Muhikihye, O Moopoli ooreera murima. Mwiiwe wunla waka vowiiyeviha." Kinrowa oxaya, ni kiwiipelaka mittotopelo Apwiya. Miyo kinoolaleya, miyo...mapuro othene onrow'aka. Khamuntthuna okhala siiso? Oosareya Eroho Yowarya, Eyo enimootannyani. Oh, wulu! Owiiwaka awo wiipa isipo iye soonanara, pooti wiipa ela:

Kinrowa Muttetthe wa natiri,
Kinrowa Muttetthe wa natiri;
O t'ani onthhuna orwa arowe ni miyo?
Kinrowa Muttetthe wa natiri.

Kinrowa Muttetthe wa natiri,
Kinrowa Muttetthe wa natiri;
O t'ani onthhuna orwa arowe ni miyo?
Kinrowa Muttetthe wa natiri.

Kaphwanya-ru omumula iwo wooreerihiwa,
N'ukhala ooreeriwa voohimala!
Koonu-ru wiitho w'Atithi aka,
Ni omumula vatthirima Vaya?

Kinrowa Muttetthe wa natiri,
Kinrowa Muttetthe wa natiri;
O t'ani onthhuna orwa arowe ni miyo?
Kinrowa Muttetthe wa natiri.

158 Khamunthuna orwa, orowa vamosa? Kinnuupuwela okathi waary'ahu oophiyaka imiya thanu iwe okathi waapatisaaka emiya ni miloko miili, okathi ene yoola wa mwaakha, wenno nno mukerekhere wa muro, okathi Ettheneeri ile Yuulupale y'Oxaka yaary'aya omuro. Aleluya! Nsu naalavula mwa Yeeyo, khwira, "Nihiku nlo munoomwarya Ehapari yooreera molumwenkuni mothene." Moota xeeni mmiravo mmosa, masikhini, mwaamukhaani, oohisuwela a mmatta aarowa'awe ophiyererya wira yeeyo? Mahala a Muluku! Amen.

159 Oh, t'ani onthuna orwa nirowe? Muhiye, mukakhe, soottiyelela sothene vano. Muhiiweleleke irooho iyo soowootoha. Murwe, mwiiwe Masu a Muluku, SIISO ANIHIMYA T'APWIYA! "Ooreeriwa t'ale anvoliwa etala ni ntthona mwaha w'exariya, okhala wira anoovona."

160 Nrowe nuurame miru sahu vano okathi onvekel'ahu n'ala waltaari.

Aana oophentiwa, kintthuna wira muupuwele, voosiis'ula, muri vo wira mukakhe yoottiyelela. Muri vo wira muhiye itthu sinttiyelela ni etampi enoorukureryani vookhweya-vo. Paulo oohimya, mwa aHeperi, kapiitulu 12.

...vano hiyo-tho... nrukureriwe n'anamoona anci-ene ntoko meeku, nirihe itthu sothene sinnittiyelela, ni etampi... ennirukurerya vakhiviru,...

Nto kihimyeke-tho exeeni? maana... nkirina-tho okathi... woomuhimya Kitiyoni, ...sa Palakhi, Parakhi, ...sa Sansoni, ...sa Yefite; sa Davidi... sa Samuweli, ni sa maprofeta:

Yaawo mwaha wo waamini yaahikuxa ilapo, yaaheettela exariya, yaahipwanya soororomelihiwa, yaahitthuka iyano sa akharamu,

Yaahittipiha owali wa mooro, yaahitthyawa wiwiwa ni xoowa, mwa olosowa khukhala atthu oowerya, ni khwaaxintta... awanani... mukhottoni khutthyawa...

Ni athiyana yaahiwaakhela atthu aya yaakhwiye yaawo yaahihimuxiwe khuphwanya ekumi...

Akina yaahihaaxiwa, yaahiveehiwa ni yaahimaniwa, ...ovikana seiya, yaahitthukiwa ni ikwirinti ni khuheliwa mukhatteya:

Nto—nto akina yaahiphwanya ohaaxiwa... oveehiwa... omaniwa...

...awo othene yaarina onamoona wooreera mwaha wo waamini,...

Nto othene ala, arine-ene onamoona wooreera mwaha wo waamini, khayaakhenle yaaroromelihiw'aya:

Okhala wira Muluku oonilokiherya etthu yooreera yuulupalexa, wira nihikhanle hiyo awo ahireerihwe voomalela.

Vano hiyo-tho...nrukurere we n'anamoona oowaatta ntoko meeku, nirihe itthu sothene sinnittiyelela, ni etampi...ennirukurerya vakhiviru, wira nitthimakele ni nthiti muteko oleeliw'ahu,

Ninwehexexaka Yesu yoowo okhanle mulipa oopacerya ni oomaliherya waamini wahu; owo aahihiya ootteeliwa murima waarin'awe khuvilela mwiikimanyo, ahithokoreryaka wuuliwa muru, ni... okilante moonoo woolopwana w'ehice ya Muluku.

¹⁶¹ Yesu, mwa ovekela Wawe, iirale, "Tithi, Miyo kinniireeraha Mmansaka." Yesu aahikhala ooreerihwa, wa Ekereja. Owo aamuwerya othela, masi khiirale. Owo aahikhala ooreerihwa. Owo iirale, "Mwaareerihe, Tithi, mw'Ekeekhai. Masu Anyu Ekeekhaii."

¹⁶² Vano rowe nirihe sothene sinnittiyelela. Nyuwo murina mukhalelo w'oviruwa? Murina etthu, eniwiirihani olavula okathi wahaatthuneya wira mulavule? O Muluku! Murihele vaavo vano. Murihele vaavo, nwehe Mooro wa waltaari okhuruwaka n'ukuxa-vo. Nwehe ophenta wa Muluku opahaka-vo. Nwehe erala eyo yothene, enamuna munlavulak'anyu n'amwaar'inyu, enamuna munlavulak'anyu n'aiy'anyu, enamuna munlavulak'anyu ni namaithoko anyu, enamuna munaalavulak'anyu athu mukereja, murihele waltaari voosiis'ula, nto Mooro wa Muluku onookhuruwa okumihe-vo naanaanoru, nto ophenta wa Muluku onoopaha nipuro na yeeyo.

¹⁶³ Murina eretta? Murihele waltaari, mwiire, "Pwiya, ela eri va. Mukhalihe mwa miyo erooho yooreera. Mukhalihe mwa miyo owerya wo ovoniha." Moone etthu Muluku enrow'awe wira. Muluku onimwiira voosiis'ula.

¹⁶⁴ Tith'ihu a Wirimu, hiyo ninuurama Ohoolo Wanyu, mwaha w'ale waltaari. Muhiye mahal'Anyu ekhale mwa khula mmosa a awo, Tithi. Vano ntoko awo...Pwiya, nkikhanle owiirela awo. Awo ahaana wira mmansaya. Khaavo okhanle owiirela. Awo ahaana wira meekh'aya. Muhiye minepa saya vano siire mwa yaawo, "O Muluku, mukhalel'ola wo oviruwa, miyo kinrihela va, Pwiya. Nkinkhalakhala kikuxaka. Hata wira eniireya exeeni, miyo kinoohiya, okhuma vano mpakha ohoolo. Nlumi naka nla nihinreereke wiikelihia ipantte sa nikhuru no waapa vookhweya, Pwiya, kinrihela vaava. Nkinkhalakhala kikuxaka-tho. Mureerihe nlumi naka, Pwiya. Mukihiye koone Malaikha eviraka, ntoko Yesaya iiraly'awe okathi ohimaly'awe wira, 'Miyo ka iyano soonanara. Kootakhaliwa miyo!'" Vano Nlaikha khurwa, khikuxa epano, khuruwa waltaari khikuxa

makhala a Mooro, khuhela owanoni wawe khimureeriha. Muluku, mmureerihe khula namalavula, voosiis'ula, onlavula voonanara ni oruuha ohiivanana. Munivahe, Pwiya.

¹⁶⁵ Iretta sothene suuramme va mpaani mu, atthu anwereiwa, esuwelaka wira awo axetwani, nave. Muluku, ntoko murumeyi Anyu, miyo kinnipwapwela, mwa Nsina na Yesu. Wira simukhume khula mutthu onwereiwa. Ni wira khula mutthu ootakhala, orina miyuupuwelo soonanara, soohifayi, ithaama, alopwana n'athiyana, siiso-tho, Muluku, mukumihe mwa yaawo. Othene ala va antthuna waahiya asikaro, ni soowuurya sikhaani s'epatthani, ni maira makhaani, n'itthui s'erala; Muluku, muhakalalihe murim'aya ni Eroho Yowarya mwa enamuna emosa itthu iyo sihinrow'aya-tho okhalana otthuna. Khasinrowa okhalana hata opuro; nyuwo munkhala oosareya Eroho Yowarya, okhuma vaavo mpakha ohoolo.

¹⁶⁶ Muluku, mukhalihe ekerej'ela yaamukhaani mwiiwa onivarela. Mukhalihe nipuro na Eroho Yowarya, mukhalihe Mooro onivarela, wira olumwenku orukunuweke wira woone ovuwa wa Muluku. Muluku, mpacerye n'atthu ala vakhaani, imiya piili va voosiis'ula. Munivahe, Pwiya.

¹⁶⁷ Mureerihe khula murima, khula mMetotista, khula muPatista, khula muKatolika, khula Prespiteriyaano, khula muPentekosite. Pwiya, mukumihe vamurimani vaya, ni mwaahiye erwe wa Nyuwo olelo. Munivahe, Tithi. Miyo kinnaaroromela wa Nyuwo, ni kinaavahererya wa Nyuwo, mwa Nsina na Yesu Kristu, wira sirapihiwe minepa saya ni ovonihiwa erutthu aya. Amen.

¹⁶⁸ Kaatthuna kisuwele, waltaari, nyuwo moohiya muritti anyu? Munnoona ntoko wira ohanle weiwo? Moonaka wira ohanle weiwo, nyuwo mukhale mphuki. Nyuwo t'ule munvekela. Miyo koolaleerya. Nyuwo munoovekela. Muritti anyu woohala weiwo, munna mulopwana, muthiyana? Munniwerya ohiya weiwo vekeekhai? Mwaaweryaka vale, nvenxe ntata, mwiire, "Ayo, Muluku, vano miyo kinihiya wenno. Ohiivananeya waka, kinihiya wenno waltaari." Ankhi, wokiseryani wa waltaari nno, moonoo aka woolopwana, muhano? Munniwerya ohiya weiwo? Munniwerya ohiya muritti uwo wa khalayi khuhala weiwo? Mwiire, "Ayo, waamini waka onweha wa Nyuwo, Nyuwo Mwaapwittipwitthi a oKalvario." Othene niipaka vamosa vano.

Waamini waka onweha wa Nyuwo,
 Nyuwo Mwaapwittipwitthi a oKalvario,
 O Moopoli a oMuluku;
 Vano mukiiwe okathi onlomp'aka,
 Mukumihe sootheka saka sothene,
 Oh mukihye okhuma olelo
 Kikhale othene Awinyu!

169 Nrowe nivenye neemele, oottittimiha saana, atthu othene. Vano mwiiwe saana, atthu othene vano. Ohikhale onkhuma. Paahi . . . Muteko khomanle. Kintthuna wira mwaakhele mureerih'ola mwaamukhaani, nttittimiho mwaamukhaani.

Okathi makhalelo ankhal'aya ooriipela,
Ni oxanka okirukureryaka,
Nyuwo mukhale Muhooleli aka;
Murukunxe epiphi okhale othana,
Muukutthe maithori,
Ni mukihye okhuma olelo
Kikhale othene Awinyu!

Muhimwiipele mukhw'inyu vano. Mphunye maitho, nto niipe vakhaani-vakhaani, nimuvenxeryaka matata Muluku.

Okathi makhalelo ankhal'aya ooriipela,
Ni oxanka okirukurenrye,
Nyuwo mukhale Muhooleli aka;
Murukunxe epiphi okhale othana,
Mukumihe maithori a mixankiho,
Muhikihye nnakhala kikhumelaka
Ottaiwene wa Nyuwo.

Kookhalana Atithi okhopela iwe,
Kookhalana Atithi okhopela iwe,
Kookhalana Atithi okhopela iwe,
Epantte ekina.

Oh, nihiku nlo noowaarya kinoorowa kawoone
Yaawo,
Nihiku nlo noowaarya kinoorowa kawoone
Yaawo,
Nihiku nlo noowaarya kinoorowa kawoone
Yaawo,
Epantte ekina.

Oh, nihiku nlo noowaarya siiso nry'ene meelo,
Nihiku nlo noowaarya siiso nry'ene meelo,
Nihiku nlo noowaarya siiso nry'ene meelo,
Epantte ekina.

170 Kaatthuna kisuwele vano, akavi arina atiithi Muttethe mukina? Nrowe noote ntata nanyu. Akavi arina amaama Muttethe mukina? Nrowe noone ntata nanyu. Akavi arina Moopoli Muttethe mukina? Nrowe noone ntata nanyu.

Khunrowa okhala muthukumano w'otthapa!
Khunrowa okhala muthukumano w'otthapa!
Khunrowa okhala muthukumano w'otthapa!
Epantte ekina iwe . . .

171 Kintthuna mwiire etthu. Vano niipaka-tho yeeyo, kintthuna nvahane matata ni mutthu vakhiviru ni nyuwo, nto mwiire, "Munna, mulopwana, muthiyana, mukivekelele, wira kikumane

ni nyuwo Muttethe mukina.” Muhiire ’vahikhanle wira munootthuna. Akavi antthuna okumana mmosa ni mukhw’awe? Akavi antthuna okumana n’atthu othene va, Weiwe? Hiyo, vekeekhai ninnitthuna. Vano nrowe nivahane matata mmosa ni mukhw’awe, nto niire, “Kintthuna okumana ni nyuwo, munna. Kintthuna okumana ni nyuwo epantte ekina.” Vano niipaka ela, “Kookhalana Moopoli okhopela iwe.” Vaareera.

Kookhalana Moopoli okhopela iwe,
Kookhalana Moopoli okhopela iwe,
Kookhalana Moopoli okhopela iwe,
Epantte ele ekina.

Oh, nihiku nlo noowaarya kinoorowa omoona
Yoowo,
Nihiku nlo noowaarya kinoorowa omoona
Yoowo,
Nihiku nlo noowaarya kinoorowa omoona
Yoowo,
Epantte ekina.

¹⁷² Eyo kheniwoonihani saana ni vooreera? “Yesu, mukikhalihe vakhiviru va mwiikimanyo.”

Yesu, mukikhalihe vakhiviru . . .
Veephattuveloni yoorikaxa,
Ya mahala wa othene, muro onivoniha,
Enikhwalala okhuma oKalvario epha- . . .

Othene nvexe ntata vano.

Vamwiikimanyo, vamwiikimanyo,
Okhale ovuwa waka;
Mpakha munep’aka okuxiwa khuphwanya
Omumula omuratthini.

Vamwiikimanyo, vamwiikimanyo,
Okhale ovuwa waka,
Mpakha munep’aka okuxiwa khuphwanya
Omumula omuratthini.

Miyo kinnimpenta Owo, miyo kinnimpenta
Owo.
Okhala wira Owo t’opacentre okiphenta miyo
Nto oothuma woopowa waka
oKalvario.

Attottopeliwe Muluku!

¹⁷³ Nrowe voomaaleleya vano nuurame miru sahu paahi. Ni mwa enamun’ahu yoohi yoophenteya, nimuttotlopele Yoowo paahi ni matat’ahu osulu, niiraka, “Kooxukhuru, Pwiya, mwaha wo woopola munep’aka. Kooxukhuru, Pwiya, mwaha w’okikhaliha mukumi. Kooxukhuru, Pwiya, mwaha wa sothene muniir’anyu, muruhaka otaphuwa woosiva, muruhaka woopowa wa mahala. Kooxukhuru, Pwiya.” Hiyo

ninnoovahereryani oxukhuru. Hiyo ninnoottotopelani okhala wira Nyuwo mwa oophenteya. Nyuwo mwa Ekhokowa ya Mukhatoni, Ettheneeri y'Oxaka, Ethutu ya Saroni, Othene mwa Othene. Nyuwo mwa Tithi, Mwaana, Eroho Yowarya; Ole Aakhanle, Ole Onkhala, ni Onrowa Orwa; Alfa muulupale, Omeke. Nyuwo mwa Ole Oothamaleya, Mwene a Murettele, Yoophuwa ni Osuulu wa Davidi. Nyuwo mwa Sothene! Ni ninnooxukhuruni Nyuwo, Pwiya, mwaha wa sothene siniir'anyu. Hiyo ninnooxukhuruni Nyuwo mwaha wa Masu Anyu, okhala wira Owo Muthuko mphironi mwahu. Oh, hiyo ninnivekela, Pwiya, wira munihye neetteke moWaaryani. Munivahe, Tithi. Mwa Nsina na Yesu Kristu. Amen.

Vaareera. Nikilanthi-ene minuutu mmosa. "Ninrowa weetta moWaaryani."

Ninrowa weetta moWaaryani, Waarya
wooreera,
Murwe vaavo mattottoi a othunku anaary'aya;
Anaarya mwa hiyo, othana ni ohiyu,
Yesu, Waarya wa . . .

¹⁷⁴ Nrowe, alipa-oowaarya, nrowe niipe vano!

Ninrowa weetta moWaaryani (oreera murima,
osantu), Waarya wooreera,
Murwe vaavo mattoittoi a okame anaary'aya;
Anaarya mwa hiyo othana ni ohiyu,
Yesu, Waarya wa mulaponi.

Murwe, mmuhimye Owo okhala Mwene anyu,
Yesu, Waarya wa mulaponi;
Nto isiinu sa Wirimu sinooruma,
Yesu, Waarya wa mulaponi.

Atthu othene!

Ninrowa weetta moWaaryani (Muthuko wa
ephiro aka), Waarya wooreera,
Murwe vaavo mattoittoi a okame anaary'aya;
Anaarya mwa hiyo, othana ni ohiyu,
Yesu, Waarya wa mulaponi.

¹⁷⁵ Eyo kheniwoonihani oreera? Akavi anoona oreera? Nvenxe ntata paahi vano, mwiire, "Kinnoona oreera." Eroho Yowarya ehookumihani malepa othene. Nto hiyo (exeeni?) weetta moWaaryani. Muhiiwelele hata . . . Waarya exeenii? "Masu Muthuko." Tivo nto:

Ninrowa weetta moWaaryani mu, iwo Waarya
wooreera,
Onrwa vaavo mattottoi a okame anaary'aya;
Anaarya mwa hiyo, othana ni ohiyu,
Yesu, Waarya wa . . .

¹⁷⁶ Vano, eyo kahi yooreerexa? Enkhala ntoko khaninwerya omaliha. Eroho Yowarya enoonivarelela! Khamunoonoona siiso? Enkhala paahi ntoko . . . ? . . . Enkhala paahi ntoko enookhuma.

Ehapari yooreera envuuva ephome,
Ephome y'awiixutti akhwiye mwaha
w'Ekeekhai,
Ehapari yooreera ela ya Eroho Yowarya
envuuva ephome.

Oopacerya okhwa mwaha wa mutthokiheryo
ola wa Eroho Yowarya,
Aari Yohani Mpatisa, masi owo okhwiye ntoko
mutthu;
Vano khurwa Pwiya Yesu, awo khimukhomela,
Owo aahilaleerya wira Eroho yaamuwoopola
atthu mwa etampi.

Ookhala Petru ni Paulo, ni Yohani a emuluku,
Awo yaahivaha ikumi saya wira Ehapari
yooreera ela yaarye;
Awo yaahitakanxa ephome aya, ntoko
maprofeta a khalayi,
Wira Masu eekeekhai a Muluku ekhale
oohimmwa n'ixariya.

Nto awo yaahinvonya Sitefano, owo aalalenrye
apwapwelaka etampi,
Owo aahaananariha vanci-ene, mpakha
weepettha muru awe;
Masi owo okhwiye mwa Eroho, owo
aahivahererya erooho,
Vano khurwa wiitakanxa n'akina, muttitthi
ule onvaha ekumi.

Entthikela evuuvaka ephome, ayo, Eyo
envuuva ephome,
Ehapari yooreera ela ya Eroho Yowarya
envuuva ephome,
Ephome y'awiixutti akhwiye mwaha
w'Ekeekhai,
Ehapari yooreera ela ya Eroho Yowarya
envuuva ephome.

Nwiriyanee!

Sookhala minepa vathi v'altaari, iyo
sinookhuwela, "Mpakha liini?"
Wira Apwiya yaahukhumu ale aniira
sootakhala;
Masi anoorowa okhala akina-tho anrowa
ovaha ephome y'ekumi aya
Maana Ehapari yooreera ela ya Eroho Yowarya
ni okhwalala waya woaxeerya.

Enoothikela paahi evuuvaka ephome, aleluya,
Eyo envuuva ephome,

Kintthuna kikhale mmosa wa yaawo.

Ehapari yooreera ya Eroho Yowarya, Eyo
envuuva ephome,
Ephome y'awiixutti akhwiye mwaha
w'Ekeekhai,
Ehapari yooreera ela ya Eroho Yowarya
envuuva ephome.

¹⁷⁷ Kaanitthuna orowa okhuma vapulpitu. Amen. Oh, moota enreer'aya! Axinn'aka aavahererya ephome y'ekumi aya. Anorowa okhala akina-tho anrowa wira etthu yeeyo. Muhixanke. Naanaanoru onoophiya okathi wo wooniheriwa. Munookela ahiiso munookhuma. Iyo sothene siniikeliha vano muhina mwa Mwaataano wa Ikereja, nto sothene sinookupali. Iyo sothene sinimwiithukumanya vamosa.

Ni anorowa okhala akina-tho anrowa ovaha
ephome y'ekumi aya,
Maana Ehapari yooreera ela y'ekumi ni
okhwalala Waya wooxeerya.

Envuuva ephome, ayo, Eyo enoovuva, (Oh,
aleluya!)
Ehapari yooreera ela ya Eroho Yowarya
envuuva ephome,
Ephome y'awiixutti akhwiye mwaha
w'Ekeekhai,
Ehapari yooreera ela ya Eroho Yowarya, Eyo
envuuva ephome.

¹⁷⁸ Wulu! Kinoona ntoko Okuxiwa ori vasulu v'ekereja. Oh, enikooniha oreera paahi! Itampi sothene siri vathi v'Ephome. Moone, Eroho Yowarya ennisiveliwa ni Masu. Masu t'itthu Eroho Yowarya enly'aya, moone. Oh, wulu! Eyo enookhuruwa n'ukela eriyari y'atthu, orapiha itampi saya, okumiha iretta saya, okumiha wuukhuwa waya. Vano koohapaliwa, ohapaliwa paahi ntoko sinwery'aka okhala, ohapaliwa mwa Eroho, ophenta onkhuma vamurimani vaka. Hata wira mutthu otonko wira exeeni, yooleveleliwa. Nwanan'inyu ootakhalexa, sothene soomala. Mutthu ti mutthu otonko olavula wala ohimya etthu, vakhala wira miyo . . . ahe, miyo . . . seiyo simanle, sothene soorapihiwa vano.

Nto Eyo envuuva ephome, ayo, Eyo envuuva
ephome,
Ehapari yooreera ya Eroho Yowarya envuuva
ephome,
Ephome y'awiixutti akhwiye mwaha
w'Ekeekhai,
Ehapari yooreera ela ya Eroho Yowarya . . .

Oh, wulu! Moota ereeraly'aya!

Okathi wooreerexa wa nyuwo,
 Okathi wooreerexa wa miyo;
 Othene naitthokiharu wira nikumane ni Yesu
 Mwene ahu,
 Okathi xeeni wooreerexa onrow'aya okhala.
 Okathi wooreerexa wa nyuwo,
 Okathi wooreerexa wa miyo;
 Naitthokiharu wira nakumane ni Yesu Mwene
 ahu,
 Okathi xeeni wooreerexa onrow'aya okhala.

Ennoosivelani yeeyo? Atthu othene, nrowe!

Oh, okathi wooreerexa wa nyuwo,
 Okathi wooreerexa wa miyo;
 Naitthokiharu wira nakumane ni Yesu Mwene
 ahu,
 Okathi xeeni wooreerexa onrow'aya okhala.

¹⁷⁹ Kinoona paahi ntoko muhakalaliho wa enamuna ya khalayi ori mukereja. Khamunoona? Orapihiwa wooreera paahi, onkumiha malepa; okathi, wooreerexa pahi. Khamunoona oreera? Oh!

Kinoomuttotoopela Yoowo, kinoomuttotopela
 Yoowo,
 Attotopeliwe Mwaapwittipwitthi iiveliwe
 anatampi.

Nrowe niipe vano, atthu othene. Munnisuwela? Kinnisuwela. Murwe nno; mukikhaliherye ohoolela, Munna Neville. Ni nyuwo othene, vamosa vano, nivenxe matata paahi, mwiipe ni, vano, vano, mwawerya vale.

Attotopeliwe Mwaapwittipwitthi iiveliwe
 anatampi;
 Mmuvuwihe Yoowo, atthu othene,
 Maana Ephome Awe yoorapiha khula nlepa.

¹⁸⁰ Vano, atthu othene, nrowe!

Kinoomuttotoopela Yoowo, kinoomuttotopela
 Yoowo,
 Attotopeliwe Mwaapwittipwitthi iiveliwe
 anatampi;
 Mmuvuwihe Yoowo atthu othene,
 Maana Ephome Awe yoorapiha khula nlepa.

Amen. Ti yooreerexa?

Epooma yootteela ntoko nluku noowaarya,
 Kookhalana empa, pankwe, ni ekhara;
 Vano kinoolipelela, kiwehaka ni kivekelaka,
 Mwaha w'Epooma Yohani oonaly'awe
 ekhuruwaka.

¹⁸¹ Amen. Vooreerexa! Oh! Vano nrowe nivenye neemele, athu othene. Kinroromela wira munnoona oreera. Muupuwele muteko ohiyu. Vano nintthuna niipe esipo ahu, yooreera yoolaxeryama.

Nsina na Yesu nuurameliwe,
 Nikokhoraka munawoni Mwawe,
 Mwene a mamwene Wirimu hiyo
 ninoomuwariha nleha,
 Okathi ekwah'ahu enimal'aya.

Vaareera. Athu othene vano, vamosa. Vaareera.

Nsina na Yesu nuurameliwe,
 Nikokhoraka munawoni Mwawe,
 Mwene a mamwene Wirimu hiyo
 ninoomuwariha nleha,
 Okathi ekwah'ahu enimal'aya.

Nsina nooreerexa (Nsina nooreerexa), Oh,
 noosivela! (Oh noosivela!)
 Muroromelo wa mulaponi ni ohakalala wa
 Wirimu;
 Nsina nooreerexa (Nsina nooreerexa), Oh
 noosivela! (Oh noosivela!)
 Muroromelo wa mulaponi ni ohakalala wa
 Wirimu.

¹⁸² Voosiisu xeeni wooreera! Okathi xeeni wooreera! Nrowe nuurame miru sahu vano okathi vakhani. Athu othene enwehe Kristu vano, Moopoli anyu. Mwa enamuna yoomaaleleya, kintthuna mmuxukhuru Yoowo ni omuttotopela. Mwiire, "Pwiya, kinnooxukhuruni saana Nyuwo mwaha w'oreeriha munep'aka. Kinnooxukhuruni saana mwaha wa sothene Nyuwo munikiirel'anyu. Muhiye Eroho Anyu ekhale mwa miyo nihiku nothene, Pwiya. Ekihoolele. Ekeettiherye. Ekireerihe." Muluku oovaheni eparakha yeeyo, ti ovekela waka.

Vano nuuramaka miru sahu, Munna Neville, munilaxerye ni nuulumo na mavekelo.



IROOHO SOOWOOTOTHA EMK55-0724
(Enticing Spirits)

ETTHARANELO YA OXUTTA S'AXETWANI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yeettaka 24 mweeri wa Julho, 1955, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org